

## *ASO LUA, 17 NOVEMA 2020*

*Na nofoia le Nofoa e le Fofoga Fetalai i le itula e 9:10 i le taeao.*

Tatalo.

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

Avea leni avanoa ou te faatulima atu ai ma le agaga faaaloalo i le paia o le Palemene, e faatalofa atu i lau Afioga i le Taitai o le Malo, lau Afioga i le Palemia, o le Taitai foi o le Maota, aemaise le mamalu o le Kapeneta, Minisita Lagolago, faapea foi lea itu o le Maota o le Palemene i Taitaifono o Komiti eseese aemaise o sui usufono mamalu, o lupe lava na faia mai le fuifui e le atunuu latou te galuluega aua upufai o Malo.

E faatalofa atu foi i le paia maualuga i Ofisa Sili o Pulega o Faalapotopotoga ma Matagaluega a le Malo ua mafai ona tatou faatasi, aemaise foi o le Ofisa o le Fono Aoaofa Faitulafono ina ia faapena ona faagasolo le tatou galuega.

## **FAAALIGA MAI LE TAITAI O LE MAOTA**

*Na fofogaina e le Fofoga Fetalai le Faaaliga mai le Taitai o le Maota.*

E tusa ai ma le Tulafono Tumau a le Palemene ua tuuina atu nei le faaaliga i le Fono Aoaofa Faitulafono mo le iloiloina o Tulafono Tau Faaofi ua faaaliga iinei:

1. Tulafono Tau Faaofi o Auaunaga o le Vaai Tau, Suesuega Faasaienisi o Eleele ma le Osone 2020.
2. Tulafono Tau Faaofi o Teuteuga o le Tulafono o le Faamauiina o Pule o Fanua 2020.

**TUUINA ATU** i leni aso 16 o Novema i le tausaga 2020.

**Sainia: Susuga Hon. Tuilaepa Sailele Malielegaoi**  
**TAITAI O LE MAOTA.**

## ISI FAASILASILAGA A LE FOFOGA FETALAI

**FOFOGA FETALAI:** Ia, a o faafofoga tapuai mai Samoa e amata mai ona ao seia oo i ona iu, o le paia lava lea aua Aiga ma Tama, o Tama foi ma Aiga, le Usoga a Tumua ma Pule, Ituau ma Alataua, Aiga i le Tai ma le Vaa o Fonoti, ou te faasilasila atu e faapea:-

### 1. FAAGAFUA AI O NOFOA O SUI USUFONO.

Ua nofoilo le mamalu o le Palemene aemaise o le tapuaiga a Samoa i le taunuuga o Filifiliga po o le Resitara o Sui Tauva mo le Faiga Filifiliga a le Atunuu Aoa o le tausaga fou. I le tapunia ai o le Resitara o Sui Tauva i le aso 23 Oketopa 2020, sa tuuina mai ai ia te au le Tusi Faamaonia o le filifiliga a Sui Usufono sa tauaveina nofoa mo Itumalo Faaalaalafaga o Salega i Sasae ma le Itumalo mo Nofoa Tu Taulaga Sisifo. O le Faaiuga ua faia e nei Tamalii, ua le ogatasi ma faiga faavae o lo o limataitaiina ai lo tatou valaauina, aemaise o le avea ai o i laua ma Sui Usufono o le Fono Aoa Faitulafono. O le lē tausisia o aiaiga o Mataupu o le Faavae o le Malo Tutoatasi o Samoa, faatasi ai ma aiaiga o le Tulafono Autu o Faiga Palota 2019, o le solia o aiaiga o le Tulafono Tumau a le Palemene.

Mo faamoemoega tau Palemene, o lo o manino aiaiga o Tulafono Tumau o le Maota e pei ona aiaia e faapea:

#### **Tulafono Tumau 21(6):**

- (a) **O le a aloaia se Sui Usufono Tutoatasi, seia muta le Paeaiga, so o se Sui Usufono o ia lea ua faia le Tautoga o le Loto Faamaoni, a o le i faailoa atu i le Fofoga Fetalai se Vaega Faaupufai e pei ona manaomia i lalo o le (2)(c) o lenei Tulafono.**
- (b) **O le a aloaia o se Sui Usufono Tutoatasi mo le vaitaimi o totoe o le Paeaiga, so o se Sui Usufono o ia lea ua tuua le Vaega Faaupufai na muai faailoa ai i lalo o le (2)(c) o lenei Tulafono.**

Mo le silafia e le mamalu o le Palemene aemaise o le faafofoga tapuai mai a Samoa, ua maea ona o matou feiloai ma nei Tamalii, ma ua la faailoa manino i le Fofoga Fetalai, o le filifiliga ua o la faia, o le finagalo lava lea o la itumalo. Ua maea foi ona faailoa manino la'u Faaiuga, e mo le tausisia o le tulaga taualoa ma le mamalu o le Palemene. E ao i ai tatou

o Taitai o le atunuu ona mulimulitaia o a tatou Tautoga o le Loto Faamaoni na faia i luma o le Atua, ma tatou faaaloogia Tulafono na pasia atu e le Fono Aoa o leni.

Mo le silafia e le Maota, sa faatino foi aulape nei o Tulafono Tumau e le Maota i le Paeaiga Lona XIV i le tausaga 2010, lea sa faagafua ai nofoa o nisi o Sui Usufono Tutoatasi, ina ua faia a latou filifiliga e resitara mo se tasi Vaega Faaupufai mo le Faiga Palota Aoa o le atunuu i le tausaga 2001. O lea sa faagafua ai loa nofoa o Sui Usufono e toatolu, mo le faatinoina o a latou Faiga Palota Laiti i lea lava Paeaiga.

E avea foi leni avanoa ou te faafetai atu ai le sao taua o nei Tamalii, a o avea ai ma Sui Usufono o le Palemene, aemaise o upufai o Malo.

## **2. TEUTEUGA O POLOAIGA O FAALAVELAVE TUTUPU FAAFUASEI.**

Mo le silafia e le Palemene, ua ou taulimaina nisi o Teuteuga o le Poloaiga o Faalavelave Tutupu Faafuasei, ma ou te tapa lau Susuga i le Failautusi mo le tolaulauina o Teuteuga.

*Na tolaulauina e le Failautusi Poloaiga o Faalavelave Faafuasei.*

## **TEUTEUGA O POLOAIGA O FAALAVELAVE TUTUPU FAAFUASEI MO LE KOVITI-19**

Teuteuina le Poloaiga mo Faalavelave Tutupu Faafuasei o le Koviti-19 ina ia faaopoopo le aso o le faamamaluina o leni Poloaiga mai le aso 27 Oketopa i le aso 22 Novema 2020.

O lo o faatumauina pea aiaiga o le Poloaiga o Faalavelave Tutupu Faafuasei na muai tuuina atu.

O leni Poloaiga ua faamaonia e Lana Afioga.

**Tuimalealiifano Vaaletoa Sualauvi II**  
**O LE AO O LE MALO.**

## SAUNOAGA O MALIU

**FOFOGA FETALAI:** Ou te faasilasila atu i le mamalu o le Palemene le tuumalo ai o nisi o tamalii sa avea ma Sui Usufono o le Palemene i Paeaiga ua sola. O le Tofa ia TUILAGI Vavae ma le afioga ia MATATAUALIITIA Afa Lesa.

1. O le Tofa ia TUILAGI Vavae sa avea ma Sui Usufono mo le Itumalo Faaalaalafaga o Faasaleleaga Nu.2 mai le tausaga 1988-1991.

Sa avea TUILAGI Vavae ma Sui Usufono o le Komiti o Tulafono Tumau, Komiti o Tulafono Tau Faaofi ma le Komiti o le Faalapotopotoga o Palemene o Malo o le Taupulega.

Sa avea foi le Tofa ia Tuilagi ma Sui Fofoga Fetalai o le Maota mai le tausaga 1988-1991.

2. O le Afioga ia MATATAUALIITIA Afa Lesa sa avea ma Sui Usufono o le Itumalo Faaalaalafaga o Vaimauga Sisifo mai le tausaga 1996-2001.

Sa avea le Afioga ia MATATAUALIITIA Afa Lesa ma Minisita o le Matagaluega o Galuega, Felauaiga ma Atinae Eseese, Pulega o le Suavai, Faalapotopotoga o le Malosi Faaletise ma Fale o le Malo.

Sa avea foi le afioga a MATATAUALIITIA Afa Lesa ma Taitaifono o le Komiti o Tupe a le Palemene. O ia o le Sui Usufono o le Vaega a le HRPP.

Ia avea ia lenei avanoa e fai ai a'u ma Sui o le Palemene e molimoli ai faamafanafanaga ma faamaisega i Itumalo pele, faletua ma nofo a alo aemaise o aiga tamalii ona o pelega o i laua ua toesea ona o le valaau paia a le Atua e ala i le maliu ma le oti ua tuumalo ai o tatou uso.

O le mea lea ou te valaau atu ai ma le agaga mauualalo i le mamalu o le Palemene ina ia tatou tutulai filemu mo se minute se tasi e faailoa ai lo tatou agaga faaaloalo ma le amanaia o tatou Sui Usufono ua fai i lagi le latou folauga.

*Na tutulai fiilemu le Maota mo le minute e tasi e faailoa ai lo latou faaaloalo i sui usufono ua tuumalo.*

## **LAFO A LE TAITAI O LE MAOTA I TEUTEUGA O LE TULAFONO TUMAU**

**FOFOGA FETALAI:** Ou te tapa lau Afioga i le Taitai o le Maota.

**Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI (Palemia):** Lau Afioga i le Fofoga Fetalai, tatou te auai faatasi i le tatou viiga o le faafetai i lo tatou Matai Sili i le taitaina mai o le soifua o ana auauna ua tatou aofaga potopoto i leni taeao fou i Tiafau nei. E faatalofa atu foi i le mamalu o le atunuu o lo o faafogafoga mai i la tatou felafolafoaiga, i le Fonousu a Samoa i leni taeao fou.

Lau Afioga i le Fofoga Fetalai, e tusa ai ma aiaiga o le Tulafono Tumau 72, ou te faatu le lafo, *Ina ia faataatia i luga o le Laulau a Fono a le Palemene Teuteuga o Tulafono Tumau ma ia tuuina atu nei Teuteuga i le Komiti o Tulafono Tumau mo le latou iloiloga ma toe lipoti mai ai i le Fono Aoa o tusa ai ma Tulafono Tumau 171.*

*Faaluaina e le Minisita mo Galuega, Felauaiga ma Atinae Eseese ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo.*

## **TUUIA ATU O PEPA**

*Na tolaulauina e le Failautusi i le Fono Aoa le faasologa o Pepa e tusa ai ma T.T.49(2).*

1. S.R.2020/4, Tulafono o le Faafoga o Malosiaga 2020 – Faasilasilaga o le Amata Faamamaluina.
2. P.P.2020/2021 Nu.58, Faamatalaga o Sini Autu o le Fuafuaga Autasi a le Pulega o Faailoga ma Tusi Pasi Taualoa mo tausaga 2021-2024.

## **TUUIA ATU O LIPOTI A KOMITI FAA-PALEMENE**

*Na tolaulauina e le Failautusi le faasologa o Lipoti a Komiti Faa-Palemene e tusa ai ma T.T.52(5).*

1. P.P.2020/2021 Nu.59, Lipoti a le Komiti o le Vaega tau le Tamaoaiga i le Tulafono Tau Faaofi e Fuafua Tatau ai le Ava Malosi 2018.

2. P.P.2020/2021 Nu.60, Lipoti a le Komiti o le Vaega tau le Tamaoaiga i le Tulafono Tau Faaofi o Teuteuga o le Tulafono o le Faasologa o Tiute 2020.
3. P.P.2020/2021 Nu.61, Lipoti a le Komiti o le Vaega tau le Tamaoaiga i le P.P.2020/2021 Nu.29, Lipoti Faaletausaga a le Faalapotopotoga o Esetete Tausi a Samoa tausaga 2018 & 2019.

**TULAFONO TAU FAAOFI O AUAUNAGA O LE VAAI TAU,  
SUESUEGA FAASAIENISI O ELEELE MA LE OSONE 2020  
– faitauga muamua**

**FOFOGA FETALAI:** Ou te tapa lau Afioga i le Palemia, le Minisita o le Matagaluega.

**Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te tulai atu e faatu le lafo, *Ina ia faitauina nei le Tulafono Tau Faaofi o Auaunaga o le Vaai Tau, Suesuega Faasaienisi o Eleele ma le Osone 2020 i lona faitauga muamua.*

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi o Auaunaga o le Vaai Tau, Suesuega Faasaienisi o Eleele ma le Osone 2020 i lona faitauga muamua.*

**TULAFONO TAU FAAOFI O TEUTEUGA O LE TULAFONO O LE FAAMAUINA O PULE O FANUA 2020 – faitauga muamua**

**FOFOGA FETALAI:** Ma le faaaloalo ou te tapa lau Afioga i le Palemia.

**Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faamauina o Pule o Fanua 2020 i lona faitauga muamua.*

*Faaluaina e le Minisita o Pisinisi, Alamanuia ma Leipa ma le Minisita mo Tina ma Tamaitai, Atinae o Nuu ma Afioga ma Agafesootai.*

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faamauina o Pule o Fanua 2020 i lona faitauga muamua.*

## **LAFO MO LE FAATAATIAESE O TULAFONO TUMAU**

**FOFOGA FETALAI:** Ou te tapa lau Afioga i le Palemia.

**Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga i le Fofoga Fetalai, ou te tulai atu ma le faaloalo e faatu le lafo, *Ina ia faataatiaese le Tulafono Tumau 101(1) ina ia avanoa ai le faitauga faalua o Tulafono ia e lua na faitauina muamua i le taeao nei.*

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nu'u ma Afioga ma Agafesootai.*

*Na faamaonia le lafo.*

## **TULAFONO TAU FAAOFI O AUAUNAGA O LE VAAI TAU, SUESUEGA FAASAIENISI O ELEELE MA LE OSONE 2020 – faitauga faalua**

**FOFOGA FETALAI:** Ou te tapa lau Afioga i le Palemia.

**Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Auaunaga o le Vaai Tau, Suesuega Faasaienisi o Eleele ma le Osone 2020 i lona faitauga faalua ma ou te fia tautala faamalamalama i ai.*

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nu'u ma Afioga ma Agafesootai.*

**FOFOGA FETALAI:** Ia, o le avanoa lenei e saunoa faamalamalama ai lau Afioga i le Minisita.

**Susuga Hon TUILAEP AUELUA FATIALOFA LUPESOLIAI NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai, o le Tulafono Tau Faaofi

lenei o Auaunaga tau le Vaai Tau, Suesuega Faasaienisi o Eleele ma le Osona 2020, o se Tulafono ua tapenaina mo le faatonutonu tatauina o galuega i le vaega lea tau le Vaai Tau, o le Matagaluega o Punaoa Faalenatura ma le Siosiomaga e avea ma auaunaga o le vaai tau, suesuega faasaienisi o eleele ma le osone, ina ia atagia ai i se tulaga taualua faaletulafono auaunaga maoti o lo o faapena ona galueaiina e le Vaega lenei. O lo o aofia ai aiaiga ia o le faaaogaina e pulea ai ma faatonutonu faaletulafono le faafoega o auaunaga tau le vaai tau, suesuega faasaienisi o eleele ma le osone i totonu o Samoa, ae ua faavaeina ai foi i lenei Tulafono Tau Faaofi se faiga faatekonolosi e vave lapatai aafiaga ogaoga eseese i le faamoemoe maualuga o le tuufaatasi ma le faailoa atu o faamatalaga anoa i se taimi vave lava, ina ia mafai ai e tatou nuu ma faalapotopotoga uma lava ona nofouta i le tulaga lamatia o le aafia ai o le soifua o tagata ma le faaleagaina o meatotino ma le siosiomaga.

Lau Afioga i le Fofoga Fetalai, ua 108 tausaga talu ona faatuina le tatou Ofisa o le Vaai Tau mai aso o Siamani, ae le i i ai lava se Tulafono Faavae e faatonutonu ai ana galuega fai. O le uluai taimi lenei ua tapena ai le Tulafono lenei ina ia matua atagia ai ma aloaia ai ana galuega o lo o faatino. E pei ona silafia e lau Afioga i le Fofoga Fetalai, o le mala aupito matautia lea ua feagai nei ma le lalolagi, o le suiga o le tau, ma ua aloaia foi ma faailoa aloaia e Taitai o le Pasefika, o le suiga o le tau e afua i le vevela, e mafua ai le tele o mea ia o afa, ia faapea foi ma le mu o vaomatua, e afua mai i tulaga ia o le vevela. Ma o lea la, ua tupu ae ai se manatu o le Kapeneta, ua matua tatau ona saunia loa ma tapena le Tulafono e faaaloaia ai faaletulafono gaoioiga uma o lo o faatino e le Division po o le Vaega lenei o lo o i lalo o le vaaiga lautele a le Matagaluega o le Siosiomaga, Suiga o le Tau ma Fuagafanua.

Lau Afioga i le Fofoga Fetalai, ua uma foi ona fofoga le atunuu, o le tasi lea o Teuteuga o le Faavae o lo o fuafua e faamaonia i se taimi e le o mamao e faaopopo ai ia Minisita e toalua ona ua tele ma lavelave galuega o lo o feagai ma le Malo i le taimi lenei e ao ai ona tapenapena le Malo i le silasila totoa i Matagaluega ua lapopoa tele ae taua, i le tulaga e ao ai ona toe fetuunai galuega fai.

O tiute ma matafaioi o le itutino lenei o le tatou Malo o lo o auiliiliina atu manino i le Tulafono e faapea:

- (a) ia auiliili ma tuuina atu faamatalaga uma lava faasaienisi, faamaumauga aupito sa'o ma faamatalaga i tulaga tau le:-
  - (i) vaai tau e aofia ai le fesuiaiga o le ea, le vanimonimo o le tau i le tulaga aoaotetele ma le tulaga lelei o le ea o lo o tatou manavaina faapea foi;
  - (ii) ma le suesuega faasaienisi o eleele e aofia ai suesuega o foliga vaaia o papa ma eleele, suesuega faamaneta o eleele, suesuega faasaienisi o le lalolagi, o le fogatai, e aofia ai galu fafati, o galu



- ma apitagalu, o peau o le fogatai siisii o le fogasami, aafiaga o le fogatai mai kasa oona ma suesuega o mea o lo o i le vanimonimo.
- (iii) Ma faapea foi ona agai i le taulai o faamatalaga i le tulaga tau afuafu o le osone ma fesuiaga o le vateatea ma ia;
- (b) ia faafoeina le faamaopoopoina, le auiliiliga ma le faaoo atu o faamatalaga saunia lelei aupito manaomia o faamatalaga ma auiliiliga faapitoa mo faamoemoega o le Tulafono lenei.
- (c) ia tuuina atu auaunaga tau vaai tau e aofia ai faamatalaga uma faamaumuina, lapataiga o lapataiga ia e mafai ona tuuin atu e le Vaega lenei mo le saogalemu o le atunuu lautele. E aofia ai le faatapulaaina i vaega e pei o faatoaga, faapea foi le lapataiga e tatau ai mo le saogalemu o tagata tafafao maimoa mai, faapea foi le tulaga o le faaauau o taaloga, aoga ma mataupu eseese e aafia ai a tatou tu ma a tatou aganuu masani.
- (d) o le tuuina atu o auaunaga tau vaai tau, o femalagaaiga i luga o le ea, po o faamatalaga e fesootai ma le fesuiaga o le vanimonimo po o faamatalaga faamaumuina mo le faamoemoe i le saogalemu ma le puipuiga o femalagaaiga i le ea, e tusa ai ma Tulafono o femalagaaiga faava-o-Malo.
- (e) tuuina atu o fautuaga tau le Vaaitau, mo faamoemoega uma lava tau le gataifale, e aofia ai folauga ma femalagaaiga o vaa.
- (f) tuuina atu o faamatalaga o le tau, i le tulaga lautele ia manino lelei, ma faamatalaga ma faamaumauga e aofia ai le auiliiliga ae faapea foi ma isi oloa gaosi ma auaunaga mo faamoemoega, o lala sooupu faale-atunuu, faaitulagi ma faava-o-Malo e faatatau lea i suiga o le tau. O tiute ia e galulue faatasi ai ia le tatou atunuu ma isi foi atunuu.
- (g) tuuina atu o lapataiga tau le Vaai tau ina ia puipuia ai ma tuutiitia le tulaga lamatia o aafiaga o le soifua lautele o tagata o a latou meatotino ma le latou siosiomaga.
- (h) ia tuuina atu faamatalaga faamaumuina e faasino i le vateatea ma suesuega faasaientisi uma lava, i tulaga o le eleele ma papa, o mea ia e manaomia pe a oo ina fausia fale tetele po o maopoopo lelei ia le tulaga, ma saogalemu le tulaga i lalo ifo o tulaga fale, ia aua ne i solo gofie ai le fale i taimi o mafuie. E faapea foi i faamatalaga ma auiliiliga e fesootai ma suesuega o le vateatea. O mafuie, o galulolo, o eleele e solo, o lapataiga o mafuie ma isi mea e gaosia ma auaunaga mo le manuia au i luma o le atunuu lautele e aofia ai vaega eseese e pei o faatoaga, o le galueaina o eleele, faatoaina o eleele ma le totoina o laau. O faigafaiva, atinae o tagata asiasi maimoa mai, o taaloga, aoga ma mataupu e faapitoa i a tatou tu ma aganuu.
- (i) o le tuuina atu o auaunaga i luga o le sami, e aofia ai faamatalaga tau le fogatai. O faamatalaga faamaumuina oloa gaosi ma auaunaga e fesootai i le tai ma le fua faatatau o gaioiga, e fesootai i le fogatai.

- (j) tuuina atu o faamatalaga e faasino i le fogatai e fesootai ma le vevela o le vaega laualuga o le sami, o peau, o le fegaoioia'i o galu ma le faamoemoe o felauaiga i le gataifale, ma gaoioiga uma tau i le mataituina.
- (k) tuuina atu o faamatalaga faamauina e uiga i kasa ma sua oona (chemicals) e tusa ai ma feagaiga faava-o-Malo, i kasa oona e aafia ai le afuafu o le Osona. E aafia ai kasa ma suavai e faigofie e suavai oona, e faigofie ona mitiia ma mataituina le faaaogaina o kemikale oona, o lo o afaina ai le Osona, ma le fua o le vevela o le kelope, e aafia ai masini, o pamu, e aumaia le ea malulu i totonu o maota ma laoa.
- (l) ia atiae ma faaleleia ma faamalosi le i ai o taiala ma faiga faatekonolosi eseese o faamatalaga o le tau mo le tatou atunuu lautele, ina ia faamautinoa ai le sao atoatoa ma manino lelei, le faaooina atu o lapataiga ua tuuina atu, i lalo o lenei Tulafono, e tusa ai ma faiga faatekonolosi e vave lapatai ai aafiaga ogaoga eseese o tala o tau, po o se isi faiga e ese ai.
- (m) e aafia faatasi ai ma le faatinoga le maua ma iloilo tulaga ogaoga o le tau po o faalavelave faale-natura e tulai mai, e avea ma vaega o faiga faatekonolosi, e ono lapatai ai aafiaga ogaoga eseese o ia tulaga ma faamautinoa ai, o lo o faaauau pea ona faagaoioia i taimi uma, ma tulata mai i aso taitasi ma i ai le mafai gafatia, e mafai ai ona tuuina atu fautuaga ma lapataiga talafeagai e malupuipua ai a tatou mea totino ma soo se vaega o le atunuu, po o nuu ma alalafaga i tua.
- (n) uunaia o le malamalama, o le amanaia pe a talafeagai ai, o le faaaogaina o le poto masani ma faatinoga faale-aganuu, ua faamaonia e fesootai lelei i auaunaga o le Vaai tau. Suesuega faasaeni o eleele ma le Osona, e ala i le matauina o le vanimonimo, o le fogatai ma le eleele, o faailoilo o mea e tutupu faale-natura, po o e ala i feutagaiga ma nuu ma afioaga ma nisi lava auala. O le vaega lea, e atagia ai ia le poto masani foi o tatou lava atunuu, e faapei pe a emo loa le uila, ona iloa lea ua agai ina uma ia matagi malolosi ma ua lalata mai ia tau lelei.
- (o) o le faatagaina ma le faafaigofieina o fetufaaiga o faamatalaga tau Vaai tau, o faamatalaga faamauina o suesuega faamaonia faasaeni o eleele ma le osone ma le vaega o le Vaai tau. Po o a latou paaga ma isi atunuu, teritori, ina ia tusa ma iugafono 40 o Faiga Faavae ma faatinoga a le vaega lea o Faalapotopotoga o le lalolagi o lo o nafa ma le vaai o le tau.
- (p) vaavaaia ma matauina le faaoga tatauina o faamatalaga faamauina uma faasaenitisi o le Vaai tau, o suesuega faasaenitisi o eleele ma le osone ua aoina mai, ma faamaopopo e le vaega lenei o le Vaai tau.

- (q) fuafua tatau o totogi fuapauina ua talafeagai ma tau ua faaee atu ma le tuuina atu o auunaga a le vaega lenei. Aemaise lava pe a tuuina atu i Faalapotopotoga faapisinisi tutoatasi, po o mo faamoemoega faapisinisi ina ia toe faaolaina uma ai, po o se vaega o tupe totogi mo le tuuina atu o lea foi auunaga.
- (r) faamaonia le tauaveina pe lagolagoina foi suesuega o tomai po o aoaoga faasaientisi ina ia siitia atili ai le malamalama i faalavelave faale-natura moni tau le Vaai tau, Suesuega faasaientisi o eleele, ma le osone.
- (s) lagologo i le galuega a isi Matagaluega ma lala sooupu e tusa ai ma le tapenaina ma fuafuaga mamao o mea e tutupu e fesootai ai i le tau, ma iloiloga tatau o le tulaga lamatia o le soifua ma meatotino mai faalavelave faale-natura moni. E tutupu e fesootai ma fesuaiga o le tau.
- (t) lagolagoina o fuafuaga aemaise tulaga sauniuni i taimi uma mo le tali atu a Samoa i suiga o le tau ma ona tulaga lamatia e fesootai i ai, e ala i galuega tauave pea, a le Vaega lenei i lalo o lenei Tulafono.
- (u) fautuaina o tagata lautele e uiga i galuega tauave a le Vaega lenei ma mataupu uma tau le Vaai tau, suesuega faasaientisi o eleele ma le osone.
- (v) tauave ma le tuuina atu o nisi lava galuega tauave po o auunaga e pei ona manaomia ai e isi galuega po o lala sooupu, po o faalapotopotoga e pei ona faamaonia, e le Minisita. A matau mai e lau Afioga, toeittiti uma mataitusi o le alafapeti faa-Peretania i le tele o galuega e tatau ona nafa ma le Mataluega lenei, ona o le matautia o le mala lea e faamalumu mai luga o Samoa, ma atunuu uma o le Pasefika ma atunuu uma lava o le lalolagi. O le vaega 2, e ao i le vaega lenei ona faatino ana galuega tauave i lalo o lenei Tulafono Faafoefoe, mo le manuia lautele o tagata mo faamoemoega e faapea:-
  - (a) o le saogalemu o tagata lautele.
  - (b). saogalemu o le soifua mai folauga, femalagaaiga o vaa i le sami ma le gataifale.
  - (c). o le saogalemu o vaalele feoai i le ea.
  - (d). tapena, tapenapengaa ma le faafoega o faalavelave matuia.
  - (e). ia fesoasoani e tuuina atu faamatalaga faasaientisi ma faamatalaga faamauina faapitoa, faamatalaga e uiga i mataupu uma e fesootai i le tau, fesuaiga ma suiga o le tau, ina ia tali atu i mataupu uma mo le saogalemu o le atunuu.
  - (f). ia fesoasoani i tagata uma ma so o se lala sooupu o lo o galulue i le gaosiga o oloa tulaga muamua, alamanuia, fefaatauaiga, pisinisi, aoga taaloga, malologa i taimi avanoa ma taligamalo faapitoa mo tagata asiasi mai i Samoa.

Lau Afioga e pei ona ou taua i le amataga, o tiute nei ua faataoto atu i le Tulafono e ao ona silasila totoa i ai, e taiala ai le vaega lenei o le Vaaitau. Afai foi e manaomia pea le faaopoopo pea, e fai aso le Atua mo nisi foi teuteuga i le lumanai. Lau Afioga i le Fofoga Fetalai, o tiute na o Matagaluega lea e matua manaomia i lalo o le Tulafono. O tiute nei po o auaunaga nei, o lo o i ai i le taimi nei. O lo o i ai le auaunaga faa-vaai tau i aso uma weather forecast. E aofia ai ma tau mo le lapataiga ma silafia e vaalele feleleai i luga ae o le tatou atunuu. O lo o i ai le auaunaga faavaai tau e faasino lea i climate, le vaaimamao i afa, le tualga i le vevela o le sami ma le ea, faapea ma faamaumauga o suiga i le tau. O lo o i ai foi le auaunaga i le taimi lenei o suesuega faasaienitisi o le eleele Geo-Science, e i ai suesuega o le palapala mo galuega tetele e i ai faletetele, multi storey buildings, auala laupapa, faatanoavai, hydro dams, uafu ma isi. O mea uma na e aafia ai le vaega lenei o le Vaai tau.

O suesuega o mafuie, Tsunami, maugamu, o eleele solo ma isi. O suesuega o le maneta o le lalolagi, the earths magnetic field. O le vaega tonu lea na faataoto mai taimi o Siamani, ae o lo o taoto i lalo o fale o lo o i ai nei. O le faigata foi lea ona aveese fale ia, ona o le maoae o maneta na faataoto i le taimi lena, lea o lo o tele faamatalaga i le tau o lo o tatou faalagolago i ai. O le earth magnetic field, o lo o puipuia ai le lalolagi, mai ave malolosi o le la, puipuia satellite o telefoni ma uaealesi ma le aafia, i le afuafu o le maneta, protective magnetic field, o suesuega o le sami, sami sua ma le pe o le tai. O vaega eseese o phases o le masina, o le gataifale coastal erosion, ma isi faamatalaga taua i faasaienisi e faapitoa i le matafaga ma le puipuiga. O lo o i ai foi auaunaga o le osone mo le puipuia o le afuafu o le osone ona o kasa o le CFC, lea e gaosi mai i totonu e gaosi mai ai le ea malulu i totonu o fale faapea foi ma pusaaisa, o lea e aafia tele ai le vevela o le la, ma aafia ai foi ma le saogalemu o tagata. E toatele ua aafia ai i le kanesa o le tino. O le vaega 2 o auaunaga o lo o faatino, e faavae i faiga faatekonolosi e vave lapataia ai, aafiaga ogaoaga eseese, multi-hazard early warning system.

O le faamoemoe, ia tuufaatasia vaega uma nei i se auala vave lapatai, vave lapatai ai lo tatou atunuu mo le laveaina o soifua. O lapataiga i afa, mafuie o lologa, galumauualuluga, tsunami, eleele solo, maugamu ma mugala, e ono tupu mai ia ma isi foi suiga tetele o le tau. O fua tau mafuie, i faiga faavae o lo o i ai nei, afai e oo atu le malosia i le 7.5 pe sili atu, o le tulaga lea e ono oso ai loa le tsunami ia ma faatino ai loa le lapataiga. Tuu loa lou nofoaga ae agai loa i vaega mauualuluga ua uma ona faailoa mo le puipuiga. O nuu uma lava e i ai nai mauga ma auala, o le ala foi lena lea ua tofu lava nuu ma le tele o aualagalua faataina, e vave ai ona tapena ma o atu i mea mauualuluga. I lalo ifo o le 7.5, i le va lea o le 6.5 i le 7.4 le fua mafuie, o le mauualuga lena o le nofo sauniuni. Taofi uma le toe o e fagogota ia ma isi lava gaioiga o le gataifale ae nonofo lelei i totonu o maota ma laoa. Ae o lalo ifo la o le 6.5, ua i le 6.4 fautuaga, silasila totoa loa i le tai, taofi uma

faiva o sauni. Ae i le agai atu i luga i le 6.3, ua na o sina faasilasilaga foi lea e aumai i le atunuu.

O vaega la ia o lea e limataitaina ai, ae pei ona atagia i le tatou feiloaiga i le aso ananafi, e faailoa ai i le uluai taimi le Tulafono lenei ia ma tali atu ai foi i nisi o fesili. Sa ou matauina le agaga lea i le Maota nei, o le faailo ia vave ona tuuina atu i le tatou atunuu, aemaise lava le faaaoga o leitio, o lea o lo o faaaoga uma e le tatou Matagaluega ia isi faailoilo. E aofia ai e pei ona tatou talanoaina i le aso ananafi, le vaega ia o sailini. E i ai foi sailini ua faatu i nuu i tua faasolosolo, ua faapea foi ma isi lava fesootaiga televavave, e pei foi o TV, ina ia vave faailo atu ai i tagata ia le tulaga ua oo i ai ia le mafuie. E le afaina la i le ao, ae i ai nai faafitauli pe a tutupu mea nei i le po. Lea tatou te iloa, e le o tagata uma foi e iloa faaaoga le telefoni. O lea foi la na aumai ai le fautuaga ma o mea na o lea o le a silasila totoa i ai le Matagaluega e faatino. O le tulaga lea o telefoni foi ia mo faalavelave faafuasei ina ia iloa uma e o tatou tagata i tua. Aemaise lava le faaaoga o tatou leitio pe a manatua o tatou leitio sa na o le tasi le leitio na o le 2AP, ina ua tulai mai le Faigamalo lenei ma vaaiga mamao, e pei ona masani ai le HRPP e mamao lana vaai i luma. Na faatu ai loa ma talepe le Tulafono sa i ai sa na o le 2AP, tatala loa ma le avanoa lea la e i ai le mau leitio, ia tatala ma le avanoa ina ia tele a tatou TV, e pei la ona silafia o le matua tele lava o TV lea ua i ai nei. O le TV a le Aso Fitu, EFKS TV, o le TV1 pe ua 7 pe 8 TV lea ua i ai ma le TV a le Malo. O le tulaga lena o auaunaga uma nei, lea e galulue faatasi mo le avatuina o le upu i tua i o tatou nuu i le taimi e tatau ai ona faailo lapataiga i se tulaga vave e tatau ai. Ma o le vaega lena e tatau ai foi ona lelei fesootaiga ma Kamupani telefoni o lo o i ai, ina ia ola pea telefoni.

O fautuaga ia o le a taatia mai i le Matagaluega ma au o le Minisita fou, o le a tagai i ai, o mea lava e tatau ona fai. Ae faamalo atu i le tatou Maota ia te outou, i outou manatu ma fautuaga na aumai ananafi, i le umi o le tatou feiloaiga ma lou nofo iloa, e uma loa le tatou Fonotaga pasi loa ma lea mea, e leai foi se isi e toe tau fesili. Manatua foi o lo o i ai le fua, ae ou te le i oo atu la i le mea lea. E i ai le fua masani o le faautautaga tatau mo mea o mafuie. O lea e faapea e i ai foi ma le vaega lea e faaigoa o le modified mercalli scale, e faapea a e leai se mea faapea ae o le igoa lena o le modified mercalli scale. A agi loa se mafuie pauu uma ifo i lalo ia ata mai luga o fata, taei ma ipu, aemaise lava nofoaga tu lata i le sami. O le taimi loa lea, o le sue loa o le mea e te ola ai. Aua loa le tau faatalitali, e pau o le mea vaai le taavale, pe a i ai se taavale ia ae a leai, footy loa i luga i mea maualuluga. A feololo le lulu, e i ai le isi la faailo, lea e i lalo o le modified mercalli scale po o le MM, na ona e faalogo atu lava o la e lulu ipu na ona lulu lava ae le taei. A o le vaega muamua, le vaega malosi e matua palalasi lava i lalo ipu taei, aua loa le toe faatali. A o le vaega feololo, na ona tatagi o ipu ma maluelue le fata, o le taimi lea e tau atu ai ia oe, taofi uma loa ou faiva ae

nofo tapenapena. Ae o le vaega vaivai, ua na o se pao gogolo e pei o se taavale ua pasi ane, o le mea la lena e tatau loa ia i latou e fia fagogota aua loa le toe fagogota. O nisi o mataupu na laga mai e le tatou fonotaga ananafi, e faamalamalama atili ai ia gaoioiga o fai nei. O sailigi, o lo o i ai a tatou sailigi lea e nafa ma le faagaoioiga ma le tatou DMO, le vaega lea o le Disaster Management Office, o lo o nafa ma faalavelave faafuasei. O lea la ua i ai sailigi e fesoasoani atili, ua i ai foi ia sites, o nofoaga ua faatutu ai, o isi lea e fuafua. E oo loa i taimi o faalavelave faafuasei ua oo i le taimi e tatau ai, ona faatoa oomi loa lea o sailigi ia. O DMO la, o le latou tiute lea o le oomi o ki o le sailini. O lo o i ai foi le NEOC, le tatou vaega lea o lo o faafeagai ma faalavelave faafuasei, o lo o i ai nei le potu faapitoa mo le vaai tau pe a o ese atu ua evacuate ona o le mafuie ua ausia le malosi lea po o le fua e 7.4 i le fua mafuie, po o le sili atu foi se i uma ona toe taliu mai lea i le Ofisa i Mulinuu mo le puipuiga.

O lo o i ai ia tatou masini e 6 fua mafuie talu mai le Tsunami 2009, lea o lo o i Asau le isi i Lepiu, Vaiaata, o lo o i Apia, Togitogiga ma Afulilo. E tasi le masini tuai o lo o i Afiamalu. E maua mai foi a tatou faamatalaga tau mafuie mai i isi nofoaga i le Pasefika e tai pei o Hawaii. Pau lava le mea, e 5 minute e tuai ai nai lo le tulaga lea ua i ai Samoa. O le taimi lava e lulu ai, iloa loa e tatou le malosi ona o le tulaga lea ua faaleleia ai a tatou masini. A oso loa la se mafuie i totonu o le 2 minute ua uma ona fai le analysis, ua uma ona iloa e alii ofisa le malosi ma le tulaga, e tatau loa ona lapatai ai le tatou atunuu, ia ona alu uma lava lea. E i ai le upu foi lele a oo loa ina faatautui uma oloa a se faleoloa, ona outou faalogo loa lea i le upu – all systems go. Faaaoga uma loa auala eseese uma lava e logo ai le atunuu. O lea ua outou silafia le pou umi lea e le i leva ona faafou, faaleleia a tatou faasalalauga mai le pou lea, ua oo lava i le 2AP i le mamao e oo lava i o i Alaska, Kanata, lea ua pue mai i le mamao faasalalauga a le tatou atunuu e auala atu i le 2AP. Ia ma o le tulaga lena sa masani ona tatou faalogologo tasi i le Pacific Tsunami Warning System i Hawaii, a o le taimi nei la, o lea tatou te faaaoga, ae sili atu ona televave lapataiga tatou te maua mai a tatou lava masini ua i ai nei.

O lo o i ai le tatou auaunaga lenei mo le vave tuuina atu o tala o lapataiga i feau po o faasilasilaga feau tusitusia, facebook, internet, website, imeli, telefoni, ia ma uaealesi e fesootai ai ma le tatou Ofisa lea o Faalavelave Faafuasei o le DMO. Ma o lo o faatino tatou faalauiloa i nuu i tua e tauala atu i tatou polokalame faipaaga ma le DMO i Savaii ma Upolu. O lea ou te talanoa atu i le tiute o le auaunaga faapitoa lenei a le tatou fale Vaai Tau e afua ai le Tulafono lea faatoa tusia ai faaletulafono ona tiute tauave ma faatonutonu uma atu ai lava le faagaoioiga o le Matagaluega po o le Division.

Lau Afioga i le Fofoga Fetalai, ia o le faamalamalamaga atoa uma lena o le tatou Tulafono ua mafua ai ona ou tulai atu ma le agaga faaloalo e faailoa ma faamanino vaega eseese uma o le Tulafono lenei.

**FOFOGA FETALAI:** Ia, malo faafetai saunoa o lea ua manino ma malamalama.

**Susuga Hon Laauli Polataivao Leuatea (Gagaifomauga Nu.3):** Lau Afioga i le Fofoga Fetalai, pe maua se avanoa faamolemole?

**FOFOGA FETALAI:** Ia, se i tulai mai le sui usufono mo Gagaifomauga Nu.3.

**Susuga Hon LAAULI POLATAIVAO LEUATEA:** Faafetai i le avanoa i lau Afioga i le Fofoga Fetalai i lenei foi taeao fou i le alafai mai i faguga lelei i le Maota Fono o le atunuu. Malo afua ailao ua maua. E manatu foi o lea ua tatou toe potopoto i Tiafau nei o le malae o le taga-mamanu a Samoa. E faafeiloai atu ai i le agaga faaaloalo i lau Afioga i le Fofoga o le Maota.

E faatalofa atu foi i lau Afioga i le Taitai o le Malo ma lau Kapeneta, aemaise foi sui usufono mamalu uma o le Palemene, o sui usufono lava na filifilia mai finagalo faaalua o tatou itumalo.

E faatalofa atu foi i le faafofoga tapuai mai a lo tatou atunuu, ia viia le Atua i lenei taeao ua tatou feiloai i le lagi e mama ma le soifua manuia.

Ua ou manatu e le gugu Sakaria i lenei Tulafono taua ua saunoa i ai le Taitai o le Malo, i lau matau ua ova atu i le 100 tausaga talu ona faatoa toe fai lea o se teuteuga taua o lenei Tulafono.

Ae le i avatua se manatu lau Afioga, e avea lenei avanoa e momoli atu ai le agaga faafetai ona o le tuleiga foi ma le saunoaga a lau Afioga i le Fofoga o le Fono, ua faaalua ai le faaiuga ua e saunoa i ai i nisi o e foi o uso a faipule sa tatou mafuta. Lau Afioga i le Fofoga Fetalai, e tu matila lava ma sagatonu le malama i lau faaiuga o lea ua faafofoga le Maota, ma e leai foi se agaga i lou sui usufono ou te faataumatatao pe ou te ati se olo ma ou agai ou te faatulai i se tulaga faafinai i lou finagalo ua faaalua. Ua sagatonu lou finagalo lau Afioga i le Fofoga Fetalai. Pau lava lea, e le mama i lou sui usufono leaga o lea ua tuumuli ese nai sui usufono ua le atoa tupe i le fafao i lenei itu o le Maota. E le mama foi i lou sui usufono ona o le va faafeagai ai ma nai ia foi uso o le tatou Maota nei.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, ou te tulai atu lava ma le agaga faaaloalo, ou te tulai atu e faasao le sui usufono.

**FOFOGA FETALAI:** Se i tulai mai le Taitai o le Malo.

**Susuga Hon LAAULI POLATAIVAO LEUATEA:** Ua ou manatu ai e avea lenei avanoa ou te tulai atu ai ma le agaga faamalosi ma le agaga faalaeiau i nai sui usufono, e pei o le agaga lea ou te tulai atu ai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O lea tatou te talanoaina le Tulafono Tau Faaofi i luma o le Maota, ae ese le mea lea e saunoa i ai le sui usufono.

**Susuga Hon LAAULI POLATAIVAO LEUATEA:** A o lea e le i faia lou manatu agai i le Tulafono Tau Faaofi, o le ala lea o lou fai atu.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Po o le mea o avanoa le talanoaina o lau faasilasilaga? O le sui usufono ua leva, sa Fofoga Fetalai, e tatau ona ia silafia mea ia. Ae muamua atu, sa avea ma Sui Fofoga Fetalai. O le soli Fono le mea lea o lo o fai pea e le sui usufono lea.

**Susuga Hon LAAULI POLATAIVAO LEUATEA:** Lau Afioga o lea sa ou faaoioi atu, e leai lava se agaga, o lea sa e tuu maia le avanoa.

**FOFOGA FETALAI:** Ou te faamalulu atu...

**Susuga Hon LAAULI POLATAIVAO LEUATEA:** E pei ona ou fai atu, o lea e le i faia lau faamatalaga.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, e le i aumaia se... Ua tele le soli Fono o le sui usufono.

**Susuga Hon LAAULI POLATAIVAO LEUATEA:** E le mama le mea lea. Lau Afioga i le Palemia, e le mama le mea lea, le tiai faapea o tagata ia, ae se i fai se faamaluluuga o la e faafofoga mai itumalo.

**FOFOGA FETALAI:** Se alaala mai i lalo, alaala mai i lalo le sui usufono mo Gagai fomauga Nu.3.

**Susuga Hon LAAULI POLATAIVAO LEUATEA:** E le mama le mea lea, a mama ia oe ae le mama ia matou. A faapefea ona tiai faapea sui usufono? O la e faafofoga itumalo. Aumai se avanoa se i fai se upu.

**FOFOGA FETALAI:** Ia e faapea... Se se i faautagia mai...



**Susuga Hon LAAULI POLATAIVAO LEUATEA:** Ia a faapefea ona fai? E le o oe o le Fofoga Fetalai, o lea ou te ava i le Fofoga Fetalai.

**FOFOGA FETALAI:** Ia e faapea, a le mama la ia oe ae mama ia matou? O le a le mea ua ala ai ona le mama ia oe lau Afioga i le alii faipule? E le aumaia le agaga lena i totonu o le Palemene. E tuu a tou faiga na i tua, ae e le aumaia, o le o ese mai totonu o le Palemene, o le aafia lena i le Tulafono, aua o le mafuaaga lena o lea na mafua ai ona faia le faaiuga a le Fofoga Fetalai. A o lea ua e tulai mai e saunoa e le mama, ia ona ou manatu lea, pei e foliga foi lea o oe, e sili atu se isi vaega o le tatou mafutaga o lo o e i ai fua i le le mama ia oe ae mama ia matou. Se ou te manatu, leaga e uiga. O le mea la lea sa ou musu foi lea ou te vave faauilavea a o e saunoa, ina ne i ou vave pipii atu foi ona outou faapea lea ua ou manatu i se isi itu, ona outou tuua foi lea o le Fofoga Fetalai i liu o outou sa ma outou faapea ifo a mea o le Fofoga Fetalai ua. Ae o itu na ou te popole ai Samoa ma lau faafofogaaga aemaise foi o le Palemene. Afai o le mama ia oe, a faapefea, o le a la le mea? O le a mama ia matou? O le faaiuga lava o le faaiuga i le Tulafono.

O le mea la lea, e pei e foliga o lea o le a e tuuaia le Nofoa i le tulaga o lo o i ai, a o lea lava e manino auofala, manino le mata o le vai, ma o lea foi sa tupu muamua, ma o lea foi na tupu ia oe talu ai nei. Ioe, afai la o lea na tupu ia oe talu ai nei a o le a la le mea ua le faatupu ai ia latou ia? Ioe. E pei o le itu lena. E faamalulu atu, aua le oo lou finagalo i le itu lea, leaga e mau e maitau mau e faalele. Ou te lagona foi lou... E le te'i te'i tulai mai le Taitai o le Malo. Malie le sui usufono e agai tonu i le tatou mataupu lea ua tuu atu ai le avanoa.

**Susuga Hon LAAULI POLATAIVAO LEUATEA:** Ia, e pei o le agaga lena o lea sa tau avatu ai sou lagona vaivai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai e i ai se mea ou te fia....

**Susuga Hon LAAULI POLATAIVAO LEUATEA:** Ia paga lava lea o lea lava ta te taumafai atu, e le o se isi lava itu, na o le faamafanafanaga ma le faamalosi i nai uso. Pau lava lea o le mea na ou tulai ai. E le o se isi lava itu.

**FOFOGA FETALAI:** Malie le sui usufono... Malo faafetai.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai o se mea e fia faamalamalama lau Afioga.

**FOFOGA FETALAI:** Se i toe tuu atu le avanoa i le Malo, ona o le Malo lava latou e faapena ona maua avanoa i le faasaoga o finagalo o sui usufono e pei ona tulai mai.

Se i te tapa lau Afioga i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** Lau Afioga i le Fofoga Fetalai, sa valaau i le 2 vaiaso talu ai le tatou Fono, e talanoaina ai Tulafono Tumau ina ia malamalama ma faamalamalama i sui usufono le Tulafono Tumau i le tulaga lea o mea e fia faasao ma mea e fia faamalamalama. Sa auai Fiamae i le aso muamua, e tolu a tatou aso o le fonotaga lena e le i auai mai le sui usufono mo Gagaifomauga Nu.3.

O le tulaga taua sa tatou tagofia, a tu ae se sui usufono e lauga i se mataupu, lauga sao i le mataupu. Ma le vaega lua, e muamua ona faanoi atu i lau Afioga. A uma ona faanoi atu ua talia e lau Afioga e tatau loa ona nofo i lalo ae fai lau faaiuga. E le i faia sau faaiuga ae ua tu ae lava le sui usufono fai loa lana saunoaga, ma alu ai lava, lea sa aumai lana talosaga e fia saunoa i le vaega lea ma alu loa, alu loa e le i faatali i sau faaiuga e fai. O le ala lena lea na ou tulai atu ai, ona o le sui usufono ua leva ona Fofoga Fetalai ae aliali mai e le malamalama i Tulafono Tumau a ua leva ona nofonofa i luga i i, e te le i malamalama lava.

O le ala lena lea na ou tulai atu ai, po ua faataga e lau Afioga ona tatou talanoa i le mataupu lea ae tuu loa lau Tulafono. O le ala lena lea na ou tulai atu ai e faamalamalama i le Afioga i le sui usufono mo Gagaifomauga Nu.3, ua matua mafiafia le le malamalama i le Tulafono.

**Susuga Hon LAAULI POLATAIVAO LEUATEA:** O le mea e fia faasao lau Afioga i le Fofoga Fetalai...

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi:** O le mea lena sa tatau ona faalogo...

**Susuga Hon LAAULI POLATAIVAO LEUATEA:** Se i vaai o lenei lava e aumai lava le le mafaufau lea. Se e le o oe o se Fofoga Fetalai sole.

**FOFOGA FETALAI:** Se i onosai mai lava le sui usufono mo Gagaifomauga Nu.3.

**Susuga Hon LAAULI POLATAIVAO LEUATEA:** O la e taoto mai le Pule i o e faatonutonusa tatou upu. E te le pule i le Maota.

**FOFOGA FETALAI:** Ia, ua ou manatu e tatau ona faamuta lea mataupu. Saunoa lau Afioga i le Taitai o le Maota.

**Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, pau lava le mea, o le tu sasae ae lava faauilavea ae le i fesili mai ia oe mo sau faaiuga. Tu sasae ae lava faauilavea mai ia te au, pei e le o silafia Tulafono a le Maota e maua ai le avafatafata. Ua matua faamaualuga tele le sui usufono.

**FOFOGA FETALAI:** Se i malie lava le sui usufono mo Gagaifomauga Nu.3, ia o le tulai mai o le Palemia o le tau toso o le tatou Fono ina ia faaoga tatou Tulafono Tumau, leaga o le vaiaso na tea atu nei e 3 lelei lava aso o tatou feagai ma tatou Tulafono Tumau. Ia lena e pei ona saunoa le Palemia, sa auai le Afioga i le Sao Faapito na o lau Afioga e te le i afio atu. O le faapupulaga o mataupu, o le taimi o le faauilavea. O lea la ua fesoasoani mai le Taitai o le Maota, leaga o ia o le isi sui o le Komiti lea. Ioe, o le Taitai o le Maota o le isi sui o le Komiti lea e fesoasoani mai i le Nofoa, po o le mea ua toe tiutalaloa Tulafono po o tatou o e faaoga le Tulafono. Ia, o le popolega la lea ua popole ai le Nofoa, ia e tatau lava ona faia lou tiute. O le mea la lea ou te faamalulu atu ai i le sui usufono mamalu, o uiga lava ia o le soifuaga tatou te i ai, a i ai lava se mea e naunauta ai, ia e tulai mai loa alu loa. E pei e faapena, ou te fesoasoani atu i le sui usufono se i e alofa, o oe foi o le isi toeaina ua leva ona e seei i le Nofoa e pei ona ta galulue ai. Ae tulai mai, see ese ia mai lea mea ae saunoa i le mataupu lea e uiga i le Tulafono Toe Teuteu.

**Susuga Hon LAAULI POLATAIVAO LEUATEA:** Faafetai lau Afioga. Ioe lau Afioga i le Fofoga Fetalai. E tumu lava i le agaga faaaloalo ona o le silasila lelei, o oe le malu Toleafoa, o oe o lo matou maluapapa, ua na o matou o tagata o lo o tutu toatasi i le Maota e le lagona so matou leo. E leai la se isi matou te sulu i ai. A lea e sagatonu lava si au upu. A o le tulai mai pea o le Taitai o le Malo lau mai le le iloa, valea. O le a faapefea ea ona fai nei mea? O lea ta te taumafai atu i le agaga faaaloalo. Se e le mama ia ta ita nai sui usufono ia.

**Susuga Hon Tuilaepa Auelua Fatialofa Lupesoliai Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai o le mea e fia faasao...

**Susuga Hon LAAULI POLATAIVAO LEUATEA:** Ioe. O lea e naunau mai lava, e le iloa se mea, e le malamalama. O le a faapefea ona fai pea nei ou tuufau? O ai ea oe e te fesiligia ai le itumalo lenai?

**Susuga Hon Tuilaepa Auelua Fatialofa Lupesoliai Neioti Aiono Galumalemana Dr. Sailele Malielegaoi:** O lea ou te tulai atu. O lona uiga ua e toe soli Fono foi?

**Susuga Hon LAAULI POLATAIVAO LEUATEA:** O lea ou te soli Fono.... Fofoga Fetalai...

**Susuga Hon Tuilaepa Auelua Fatialofa Lupesoliai Neioti Aiono Galumalemana Dr. Sailele Malielegaoi:** A ou tu atu i le mea e fia faasao nofo i lalo.

**Susuga Hon LAAULI POLATAIVAO LEUATEA:** Nofo oe i lalo.

**FOFOGA FETALAI:** Ia malie, ia malie, ona o lea ua faafofoga Samoa. E i ai le manatu, o Samoa, malie le sui usufono mamalu. Malie le sui usufono. Ona e i ai aulape o le tatou Tulafono, e mafai ona faatonuina le leo o le Maota, le Satini ina ia.... Sui usufono mamalu e, e le faigofie lou poloaiina o le Satini e faatumuli a lua Afioga i fafo ae se malie ia... Ioe, e faapena. O lea foi ou te matauina, o lona ua e aapa i le tulaga foi lenei o le Vaega Faaupufai ua faaigoa o le Faatuatua Samoa ua Tasi. Ia a o lenei e matau atu, e faapena uiga o le soifuaga lea tatou te i ai. E faamalulu atu ai i le Afioga i le Palemia, ona o le faatulagaga o le tatou Tulafono Tumau, aua o le tiute lea o le Malo o le tau fesoasoani mai i le Nofoa e tau faatulaga a tatou Tulafono Tumau. Ia po o le a lava le Tulafono, o Tulafono o la e aumai e i latou e faapena ona aumai e faagasolo ai tatou galuega.

O le mea la lea, malie le sui usufono. Ou te faamalulu atu foi i lau Afioga i le Taitai o le Maota, i le tulai mai o le sui usufono foi i le manatu mai i le va ma le Nofoa, o uiga lava ia o le soifuaga tatou te i ai. E i ai le manatu, se aua ne i tupu lenei mea o le ave i tua o se isi e le Satini o le Maota, aemaise lava tatou o le aumatutua. Ioe, o la e faafofoga tapuai mai Samoa. O Samoa e le i vevesi lava faapea, ae le fetaai. Ioe. E felafuai lava upu ae le faapena. Ua fai foi si leva o faipule. Ae aumaia lou finagalo i le mataupu...

**Susuga Hon LAAULI POLATAIVAO LEUATEA:** Ou te asuasua atu vaimalu i puega lau Afioga i le Fofoga Fetalai. Ou te faamalulu atu i sau upu ua laavale i lenei taeao. E silafia e le Atua le moni o le alofa i nai sui usufono. E ui o lea, o le a taatia sou lagona. Na pau lava lea o le mea na ou valuvalusia ai aa o le fau, ua fai le faaiuga i nai sui usufono a o lea e saofafai iinei Minisita Lagolago ua soli le Tulafono ae leai ma se mea o faia i ai. E leai ma se mea e tasi o faia i ai. O le ala lea o lou tautaualemau lau Afioga. O fea o taatia ai le agatonu? O fea o taatia ai le agatonu?

**Susuga Hon Tuilaepa Auelua Fatialofa Lupesoliai Neiotti Aiono Galumalemana Dr. Sailele Malielegaoi:** Lau Afioga i le Fofoga Fetalai, o se mea e fia faasao. O se mea e fia faasao lau Afioga.

**FOFOGA FETALAI:** Malie le sui usufono...

**Susuga Hon LAAULI POLATAIVAO LEUATEA:** E ui i lea, ua foi sou lagona. Lau Afioga, o le a faaali sou manatu e uiga i le Tulafono Tau Faaofi.

**FOFOGA FETALAI:** Malie le sui usufono se i tulai mai le Taitai o le Maota. Saunoa lau Afioga i le Taitai o le Maota.

**Susuga Hon Tuilaepa Auelua Fatialofa Lupesoliai Neiotti Aiono Galumalemana Dr. Sailele Malielegaoi:** O se mea e fia faasao. E le i suia se Vaega Faaupufai a Minisita Lagolago lea e faavae ai le faaiuga lea. Ma o la e malamalama lelei i ai le sui usufono mo Gagaifomauga Nu.3, lea na tau tonu lava ia te ia le Tulafono, ua sui lana Vaega, lea na mafua ai ona fai lana faiga palota. A o le taimi lenei, o lea ua tulai mai, o i ina tonu lava i le tatou Tulafono na pasi, pasi a o i ai i laua uma ia i totonu o le Palemene lenei. Ua fai si leva o le Tulafono, a o lea la e aliali mai, e faataga le malamalama i le Tulafono ona pei lea ua tuuaia lau Afioga i le Fofoga Fetalai.

Na pau lava lenei o le mea lea ou te tulai atu ai. E faigofie tele i le sui usufono ona lafo upu pepelo i totonu o le Maota lenei, ae o la e na te silafia lelei le eseese o mea.

**Susuga Hon LAAULI POLATAIVAO LEUATEA:** Lau Afioga i le Fofoga Fetalai, se paga lava lea, ua e faafofoga ea i nei upu e lafo mai? Ua faafia ona lau le mea lenei o lenei lava e tuuai ta ita i nei upu faapenei?

**FOFOGA FETALAI:** Malie le sui usufono...

**Susuga Hon LAAULI POLATAIVAO LEUATEA:** Se malie lau Afioga i le Fofoga Fetalai, ua logo le lalolagi atoa i le lau o lo'u gaosi ma le pepelo faamolemole. A faapefea ona tuufau upu ia e alu? Se malie lau Afioga. Se malie Toleafoa.

**FOFOGA FETALAI:** Ua ou manatu e... Se i onosai mai se i taumafai atu se...

**Susuga Hon LAAULI POLATAIVAO LEUATEA:** Sole, o le a tuufau ea la le Palemia e fai lona le mafaufau ae faapefea matou?

**FOFOGA FETALAI:** E i ai le mea lea e tupu. O le mea lea e tupu, o lea o le a avea le Palemene ma mea... Malie le sui usufono se i taumafai atu se tala. O le mea lea o le a tupu, e pei o le a aumai mataupu faa-faamasinoga e fai i totonu o le Palemene, a o lea lava e manino auofala i le valavala o mataupu. E eseese mamao mataupu, ae e i ai le manatu o lea o le a tatou talanoa i mataupu ese e le tatau ona talanoaina i totonu o le Palemene ae tuu le mataupu e uiga i le Tulafono i lona faitauga faalua.

O le mea la lea ou te fesili atu i le sui usufono mamalu, se malie ia, e le mafai foi ona noatia le tulai ae pe taofiofia foi le tulai mai o le Malo e faasao i le tulaga o a tatou Tulafono Tumau.

Ou te faamalulu atu foi, ou te faamalie atu foi i lau Afioga i le Taitai o le Malo i sou finagalo e tuuai ai le la Itu o le Maota i le tulai mai o Gagaifomauga Nu.3, ia malie ia le tofa i lau Afioga i le tulaga o lo o i ai, ae i ai le manatu, Laauli ua ou tapa fua i lou suafa e le o se tuli ua vale.

**Susuga Hon LAAULI POLATAIVAO LEUATEA:** Ioe Toleafoa ua ta toe faalalolalo atu...

**FOFOGA FETALAI:** A e see ese lava ma e usitaia le mea lea ou te fai atu ai...

**Susuga Hon LAAULI POLATAIVAO LEUATEA:** Ua ta toe faatoese atu foi. Na pau lava lea o le mea e ala ai ona fai atu lata upu, se aua le taalo i le tino. O lea ta te taaalo i le tulaga o lea e tau faamalamalama atu le lagona o leni itumalo. Ioe. A o lea e tau fai atu sata upu i le Tulafono na aumai nei.

**Susuga Hon Tuilaepa Auelua Fatialofa Lupesoliai Neioti Aiono Galumalemana Dr. Sailele Malielegaoui:** Lau Afioga i le Fofoga Fetalai, o le tulaga lea ou te tulai atu ai, ua fai soo lava le mea a le sui usufono i le tu ae lava tuuaia oe e taalo i le tino, tuuai mai au e taalo i le tino. O lea ou te faasaoa atua le Tulafono sa tatou talanoaina. Ua faafia ona fai? Lea foi na e tu ae nei lava i luga e te le i faanoi i le Fofoga Fetalai? A o le a ou faamagalos i ai ina ia faaauau le tatou Fonotaga a ia agai sao mai i le mataupu lea e talanoaina o le Tulafono o Mea Tau Vaai Tau.

**Tofa Hon Faasootauloa Pati Taulapapa (Gagaemauga Nu.2):** Lau Afioga i le Fofoga Fetalai e faamalulu atu ma le agaga faamaualalo...

**FOFOGA FETALAI:** Ia, ua i ai le manatu... Ae i ai se isi sui usufono e fia saunoa i le mataupu leni? Se i tulai mai lava pe i ai se isi sui usufono e fia saunoa? Leai, le mataupu e uiga i le faitauga faalua o le Tulafono Tau Faaofi o le Vaai Tau...

**Susuga Mulipola Leiataua Laki (Aiga i le Tai):** Lau Afioga i le Fofoga Fetalai, na o se vaega e fia faasao i le saunoaga a le sui usufono mo Gagaifomauga Nu.3 pe a maua se avanoa faamolemole.

**Susuga Hon LAAULI POLATAIVAO LEUATEA:** Ia, ou te manatu o le a ou see ese...

**Afioga Alaiasa Muagututia Moefaaauo Malagaitutogiai Sepulona Moananu (Anoamaa Sasae):** Lau Afioga ou te fia fai foi sou manatu i le tatou Tulafono, ae leaga o lea ua oo mai le taimi o le tatou malologa, ma le faaaloalo i lau Afioga.

**FOFOGA FETALAI:** Malo faafetai. Ia, o mataupu ia, o lea o le a tatou talanoa i mataupu e le tatau ona o tatou talanoa i ai, o la e i le faamasinoga e le i oo mai, o mataupu e ese le mea e tagofia ai, ona aumai foi lea fai le faaiuga a le Nofoa e tusa ai o a tatou Tulafono Tumau ia ma le Faavae. O le mea la lena e le mafai ona faapea e afisi le isi ae faasavali le isi leaga e pei o le a tuuaia ai le Nofoa, ou te musu tatou te talanoa i ai i le tulaga lena.

O le mea la lea lau Afioga e i le sui usufono mamalu ma nisi o sui usufono o lo o fia tulai mai, ia, e leai e eseese foi mea, o le isi ia e ala ona le toe alu i le palota e le i resitala, ona o lona term mulimuli lenei e faauma lava la le taimi na tauto ai. Ae le faapea o le le i resitala, ona te i lava lea ua motusia ai fua. Leai e faapena ala o mea, e le i atoa le 5 tausaga. Se i silasila mamao i ai i le itu lea, aua le feniniaia mea, ma ua ou manatu, se alolofa ia sui usufono mamalu. E tasi lea itu ou te faamanatu atu, tasi lea itu e le palota ai le itumalo ia ta ita o le vaovaogata i le faafofoga mai o lea e vaovaogata. Ae alolofa, o le ala lena e ala ai, seiloga o le matai ona faatoa mafai lea ona ave ma sui tauva e fai ma faipule, ona o le matai o la ua ia i le tofa, o la e ua masani i le mea foi lea o le fetoi ma faafitauli i tua ona sau ai lea i totonu o le aiga, sau i totonu o le nuu. E pei foi ona saunoa le Palemia talu ai pei lava o ananafi, ia sau i le Ekalesia sau i le nuu sau i le itumalo faatoa sau ai i le Malo. Ia o le a tafaina lava sau i le Malo e teuteu upu o le Malo e oo lava i lona aiga e le mafai ona ia teuteua? Ia, o le mea lena, o le fesili lena e fesili ai, a e iloa teuteu lou aiga, ma lou nuu ma lou itumalo ma lau Ekalesia, e te oo mai foi i le Malo, o le faigofie ia ona e teuteua le Malo. Aisea? Ua e masani. O le mea la lea, malilie ia sui usufono mamalu, masalo o le a muta ai i i le mataupu lea. Malie lau Afioga.

A i ai se isi sui usufono e fia saunoa i le mataupu lenei, o le a faaauau le saunoaga pe a tatou toe taliu mai i le tatou Fonotaga. Ae ua ou le toe faataga lau Afioga e toe saunoa i le mataupu lenei. Ae afai e saunoa mai foi se isi sui usufono o le mea lava e tasi, o le a tuu atu loa le fesili. Ua alu le aso ananafi o fai le tatou semina ua manino atoa auofala. E faigofie lava le

mataupu lenei, o le mataupu ina ia vave logo ai le atunuu ina ia sao ma uli lo latou soifua mai mala faalenatura.

O le mea la lea, o le a faataatiaese Galuega a le Fono Aoaofa Faitulafono mo lana malologa masani.

*Na faataatiaese Galuega a le Fono Aoaofa Faitulafono i le itula e 10:35 le taeao ma toe faaauau i le itula e 11:35 le taeao.*

**FOFOGA FETALAI:** Ou te faasilasila atu ua toe amatalia Taulumaga ma Galuega a le Fono Aoaofa Faitulafono.

Ua ou manatu ua maua foi le faaopoopoga o le malosi o le paia o le Palemene e faaauau ai le tatou Galuega e faapea foi Ofisa Sili o Pulega o Matagaluega ma Faalapotopotoga a le Malo.

Ia, e i ai le manatu o lea sa tulai mai sui usufono e toalua e fia saunao, toatolu e fia saunao i le Tulafono lenei, ia malie ia, o le a amata atu i le sui usufono mo Palauli le Falefa.

**Afioga Hon FAUMUINA TIATIA FAAOLATANE LIUGA (Palauli le Falefa):** Faafetai i lau Afioga i le Fofoga Fetalai mo le avanoa. O le manino ia o le folasaga a le Afioga i le Palemia i le Tulafono Tau Faaofi, ua uma foi ona faataatia matafaioi ma le alavaa e faataatia ai galuega fai ma le Tulafono.

O nai fautuaga la ia e tuuina atu i le alavaa lea ua faataatia. O le fua o le mafuie, le malosi, ia o lea e faapea mai a lulu, taei ipu, e i ai aiga o le tatou atunuu e leai ni sefe ipu. Ae a pe a tau i ai e faatautau ni apa faapaukoko po o ni falai i tafatafa o mea e momoe ai toeaiina ma loomatutua, a lulu la le mafuie, ona faalogo lea...aue e tele aiga e leai ni ipu, tele aiga e leai ni sefe. E manatua ai le toeaina lea o Tuilagi, sa nofo i tala mai i le mea lea e te afio ai, o le toeaina lena sa masani ona matou tafafao i le RSA. Na i ai la le mafuie na oso i le 1975, fai mai le toeaina lea, o le mafuie lea e pei o se tagata, ua alu atu talai ie o faitotoa o a latou sefe e pei e sue meaai, o lona uiga e i ai mafuie faapena. E tatau foi la ona silasila i ai le Matagaluega fou lea, pe a faapea o le a lulu le mafuie, aua e i ai mafuie e sue meaai.

**FOFOGA FETALAI:** E faamanatu atu ua 100 ma ona tupu tausaga o lea faatoa fai le Tulafono e limataitaina ai galuega.

**Afioga Hon FAUMUINA TIATIA FAAOLATANE LIUGA :** E leai o lea ou te....o le alafua. O lea e faaopoopo i matafaioi lea na saunao i ai le Palemia. O le Tulafono foi lea ua taua ai, le suesuega o le elele ma palapala, e i ai lou talitonuga e tatau foi ona vaavaalua ai le Matagaluega lea ma le Ofisa o Faatoaga. Aua e tatau ona iloa e le atunuu, po o a mea e ola i lea



vaega o le atunuu, ae o a mea e ola i lea vaega. E pei ona i ai nei, faataitaiga, e ola le koko i le itu o Asau, a o le fai, o le ufi, o le talo e ola i Palauli le Falefa. O le isi mea lau Afioga, o lea sa taua le Osone, o le Osone, e i ai lou talitonuga o le vaomatua le isi vaega e tele lona sao i le faaleleia o le Osone. O lau tuualalo la i le tulaga e faaleleia atili ai le vaega lea, pe a faapea o le a faavae ma pasia lenei Tulafoni, e manaia pe a tuu le matafaioi lea i nuu ma afioaga e teu e latou le vaomatua, ae aua le o fua i ai, pau lava le mea a tatou o le asiasi. Ma maua ai foi sina faamanuiaga mo nai toeaia o lo o tapuaia o tatou faiva. O le Osone, o lea la e relate lava i le mea muamua, ia faaitiitia le vela o le tau. O le faaogaina o le suauu lea tatou te faaogaina nei, ou te iloa o lea foi ua i ai fuafuaga a le Malo. Ma o lea ua pasia le Tulafono i le faafoeina o le malosiaiga.

O lea sa i ai foi le Tulafono, e faaitiitia ai le tariff po o le tiute po o le aveesea o tiute, mai taavale e alu i le eletise. O lona uiga o sauniuniga uma nei a le Malo, o lea o le a fealofani i totonu o le Tulafono lenei. ma e faapea atu ai lau tuualalo, manaia pe a faagaoioi ma faamausali atili le renewable energy faatasi ai ma le soso atu loa, amata ona oka taavale a le Malo, i mea ia o taavale e alu i le uila. Ina ia amata ai ona faufau, aua o le matafaioi lena e ave i le vaega lea o le Energy Committee lea e Taitaifono ai le Minisita o Tupe, Minisita o Galuega ma le Minisita o le Siosiomaga.

Lau Afioga i le Fofoga Fetalai, faalelei atili i le faamamaina. E tasi lea vaega e manaomia lava e atunuu o le Pasefika aemaise atunuu laiti, le mea lea o le waste management, o le tele ia o le aoga o le faaleleia atili. O lea ou te tilotilo au i le tele o taavale pala ma mea ia e paepae solo. Ua tataua ona i ai se investment a le Malo e ao ai mea nei, tuufaatasia, e ave foi i fafo e maua mai ai nisi tupe e tuu foi i o tatou tagata. Na taua foi e le Palemia le tulaga lea o le tau faaee atu, e tasi lea vaega o tau faaee atu i mea ia o le faaogaina o le auunaga lea a le Matagaluega. E tataua foi ona silasila le Malo i tau faaee atu pe a faapea o mea o pisinisi. Ae a faapea o ni auunaga e leai ni tupe e maua ai, e tataua ona faa-tuusaunua le vaega lea, ina ia faatupu atili ai le naunau o tagata e contribute i le tausiga o le faaitiitia o le vela.

O le isi vaega lau Afioga e pei o sau tuualalo lea, i le tulaga lea e i ai le tatou Ofisa tutotonu o le Vaai tau, a oo ina jam le traffic e faigata ona o mai i tai i i. Sa lelei i aso la, 100 tausaga talu ai, e tau leai ni taavale. A o le taimi lenei, ou te iloa e oo mai le tagata e alu i i, ua matua le mafai lava ua le aoga. Ae se i silasila i ai le Matagaluega fou, pe le tataua ona toe relocate le ofisa tutotonu ina ia faigofie ona access i ai le afaigaluega, aemaise foi le mamalu o le atunuu.

Faafetai mo le avanoa, faafetai foi mo le Tulafono.

**FOFOGA FETALAI:** Ua malie taliga i faalogo i le saunoaga. Tulai mai le sui usufono mo Anoamaa i Sisifo.

**Tofa Hon LAUOFO FONOTOE NUAFESILI PIERRE LAUOFO (Anoamaa Sisifo):** Faafetai i lau Afioga i le Fofoga Fetalai mo le avanoa. Faafetai foi ua maua se taligasua a le Maota ua saoiālo le taumafataga, ua maua foi si faasiligamalosi i lenei itula o le aso.

Ae ua ou tulai atu ma le faaaloalo e faaleo se lagona, e faamamafa atili ai le taua tele o lenei Tulafono Tau Faaofi. Ae ou te le i agai atu i isi nai vaega ia, ae tau lava ina faamanatu atu, i pau mai i le saunoaga faamalamalama a le Afioga i le Palemia ma lou uso a sui usufono po o le Afioga ia Faumuina, o lo o i ai lava faailoilo faale-natura ua tatou masani ai. O uiga ma amio a manu fetolofi ma manu felelei, o taifau e ou, e faapena foi mea o moa e kokoe solo. Ae tatou te iloa lava i latou uiga ma latou amio, e i ai le mea la o le a oo mai, e pei o se mala faale-natura, e tau ina faamanatu atu lena vaega, pe afai e leai ni fata ipu ma ni ipu.

Faafetai atu i le Malo i le tofa fetala'i i lenei Tulafono Tau Faaofi, i le siitiaina o le auaunaga a le tatou Ofisa Vaai tau. Aua o lea ua i ai ma faamautuina ma faaopoopo ai foi ma suesuega faasaïenisi e oo atu i le loloto i le ogatotonu o le eleele faapea le puipuiga o le afuafu o le Osone, ia aemaise faiga faatekonolosi lea ua faavaeina, ina ia vave lapatai ai aafiaga ogaoga eseese o le tau mo le silafia e le atunuu. O se tulaga lelei lea vaega, ae e taua le faavaeina o lenei Early Warning System, ae ou taofi foi e taua ona fai ma faatino ni tatou faataitaiga. E pei ona manatua sa i ai le vaitau sa faataitai ai foi a tatou faiga ia, faasalalau mai lapataiga i le leitio ma isi auala faapena fesootai, ona tatou agai lea i nofoaga maualuluga. E manatu e lelei le fai ma faatino, e faamanatu ma faamasani pea. Pe faa-lua pe faa-tasi i le tausaga, pe fai faa-vaitaimi faapena, ona tatou nonofo sauni lea ma nonofo tapena i se taimi e tulai mai ai faalavelave faale-natura. E pei o le vaega lena, aua sa i ai foi a tatou drills i la vaitaimi. O le taua o lea vaega i lou manatu, ona sa maua foi lipoti i vaitau faatoa maea le tsunami e pei ona tulai mai i le 10 tausaga talu ai, e faasalalau mai lapataiga ae o isi tutu i taligalu ma vaavaai i tai e pei e fia maimoa i le sau a le galu, ae ua le agai i uta i nofoaga maualuluga. Ia faataua le laveaiina o soifua. O le mea lea e taua tele i lou talitonuga, e tataua ona tatou vaavaai i ai, aumai pea a tatou lapataiga. O le isi mea ua matua faatauaina i lenei Tulafono Tau Faaofi, ua le gata i le vaaiga i le fesuaiga o le tau, o le weather forecast, ae ua aofia ai foi ma le vaaiga fuafua i mea totino e ono faaleagaina, damaged property. E tasi lea vaega ua taua tele, faafetai ai i le Matagaluega ma le Malo i le tulaga lea, faapea foi se vaaiga foi i faiga e tuuaititia ai lamatiaga o aafiaga o le soifua o tagata. O mea ia e taua i lou talitonuga o lea pei ua siitia lona faatauaina i lenei Tulafono Tau Faaofi. E taua tele foi le faamautuina pea o le aveā o tatou ma sui auai o Faalapotopotoga o Vaai tau o le lalolagi, faapea foi isi feagaiga faava-o-Malo ma tulaga tau vaai tau. Aua tasi ia Faalapotopotoga e fesoasoani mai i lo tatou Malo, i masini faatekonolosi faa-onaponei. Aua e taugata tele ia masini ia e tataua foi ona tatou toaga foi e auai i

Faalapotopotoga ma feagaiga faava-o-Malo faapenei. E maua ai le tatou fesoasoani tele, e le gata i lea e pei ona saunoa faamalamalama le Palemia, o le avanoa lea e fefaasoa a'i ai foi ia malamalama ma le tomiai, o lea foi ituaiga vaega o auunaga, o le vaega o le tau ma isi vaega eseese e aafia ai le siosiomaga, o vaega taua ia lau Afioga.

E taua tele foi i lenei taimi le faatulai mai o le Tulafono Tau Faaofi lenei, ona e le o po se lilo, e le o po malae i lau Afioga ma le mamalu o le Maota faapea foi le faafofogaaga a lo tatou atunuu. O lea ua tatou i le tau amataga o vaitau o matagi malolosi. A fua atu i le masina lenei o Novema se i pa'i atu i le masina o Aperila i le tausaga fou, o le tulaga lea e taua ai foi i lou sui le faatulai mai o lenei Tulafono. E aoga foi, e tataua ona tatou manatunatu aua o lea ua o tatou i le vaitau o matagi malolosi. Ua ou vaavaai atu i le upega tafailagi o le tatou Ofisa Vaai tau, malo faafetai. O le faaaliga lata mai lea ou te vaavaai atu i ai, o le aso 30 o Oketopa, le masina lea na tea nei. O lea ou te faitau atu, e le o i ai se mea e faapopoleina ai le atunuu. E le o i ai se vaega foi lea e tulai mai se matagi malosi, tatou agai atu i le Kirisimasi ma le tausaga fou. Ae o lo o mataitu le vaitaimi o Ianuari e oo atu ia Aperila. Ae e i ai lava le talitonuga e i ai matagi malolosi e taamilomilo i totonu o le tatou tafailagi, po o le tatou faaitulagi. E pei e foliga mai i le faaaliga i le taimi nei, e le o i ai se matagi e ono aafia ai le tatou atunuu. Ae o le faamamafa o lo o aumai i le faaaliga a le tatou Ofisa, e taua le nofo sauni, e taua le nofo tapena. O le mea lea e avatu ai foi se faamamafa ma se lagolago a lenei itumalo, i le tatou Tulafono Tau Faaofi e pei ona aumai nei. O nai manatu pupuu ia lau Afioga i le Fofoga Fetalai. Ia manuia le Fonotaga.

**FOFOGA FETALAI:** Malo faafetai saunoa. Malo fetalai ia te oe le matua. Tulai mai le Afioga ia Tafua e fai ma sui o ātua.

**Afioga TAFUA MALUELUE TAFUA (Aleipata Itupa i Lalo):** Faafetai i lau Afioga i le Fofoga Fetalai, faatalofa atu i le Palemia ma le sui Palemia ia Tuitama faapea le mamalu o le Kapeneta, aemaise Minisita lagolago ma lenei itu o le Maota. Malo lava le onosai, faafetai foi faapalepale i lenei aso. O se aso ese foi lenei aso talu ona ta faipule ta ita. Siisii ma lagalaga ae tua lava i le oo, e pei o le upu lea e fai i Faleata. Ae se i fai atu lava si au tala lea, e i ai le toeaina o le matou nuu e fai loa se matou Aso Gafua, o lana ia lava upu e faapea mai lana lauga masani. E lelei lava ona silasila le tatou nuu i le silasila mamao ma vaavaai mamao. E tau faatusa foi le Afioga i le Palemia, i le Tulafono lenei. Ua 108 tausaga talu ona faatu le Met Service, a o le taimi muamua lea faatoa iloilo ai le Tulafono. Ou te matau foi ma le totoa ua fai si leva ona taatia i totonu o le pusatoso le mea lea, ua leva ona lote i tausaga ua mavae le suiga o le Tulafono. Ae momoli atu le agaga faafetai ma le faamalo i le taitai e tusa ma le tulaga ua i ai lenei Tulafono Tau Faaofi, tele lona aoga, lona sao, aemaise o le vaega lea sa laulau mai ia

tiute ma galuega fai a le Matagaluega, i le vaega lava lea e pei ona tolaulau mai i lenei taeao, o vaega ia e taua tele mo le faatinoga o lenei Tulafono. Aemaise e i ai tiute ma matafaioi a le Matagaluega po o le Pulega. E faapitoa lau tautalaga i le Vaega m, o le m Samoa, lea e amata ai le moa. O le vaega lea e pei e sau ai le vaega lea e tau mai, e vave lapatai ai o afioaga **ogaoga** eseese. E pei o le vaega lena, ma o le mea lea o le lapatai o le taua ia o le faailoilo. Ona e i ai lou talitonuga, o le tagata e tulou e mavava soo po o se faataio le leoa lea, e faailoa mai ai ua manao i le ipu kofe. A o le tagata e tali upu, e faailoa ai le le mafaufau tulou. O le isi mea o le tagata foi lea,...o mea o faailoilo ia lau Afioga o lea ou te faaalua atu. Ua talanoa mai le vaega lea e toa-lua ua maea ona saunao, i mea lava ia o faailoilo. Na saunao mai ia Faumuina, e sao lelei lava, sa ou tusia. Ua ave e Faumuina ia mea sa ou tusia, ou te le iloa pe sa tilotilo mai i mea sa ou tusia i lalo. O le ato popo, afai e leai ni ipu o le sefe a le aiga, aua o isi aiga e sao, e na o le faleoo lava ma le ato popo ma le ato koko lea e taatia, pe tautau ai foi. E toulua loa i lalo koko o lona uiga ua tataua ona tamomoe i uta po o le ato popo pe afai ua lulu le mafuie, e pei o nai faailoilo na. A o le faailoilo mo le tagata ua moe taagulu, e le gata tulou e faamaga le gutu, ae pei o se vaega vaaia lea e faailoa mai ai, ua matua talia uma ona manaoga lilo sa miti i ai, i le fiafia. O uiga ia o le miti manaia ua talia manaoga faalilolilo o lona loto, na moe taagulu ai. E pei e foliga mai o matou o sui o **master gears**, o lea matou te tutu atu e fai se tala i le Tulafono, a o le taimi foi lea e tataua ona faailoa atu ma faailoilo. O le tuualalo i le Afioga i le Palemia ma le Tulafono...

**FOFOGA FETALAI:** O le fautuaga a le Nofoa e manaia ona amata mai i le itumalo.

**Afioga TAFUA MALUELUE TAFUA:** Faafetai. E tele foi nai tagata na aafia, e 140 ma ona tupu tagata na maliliu o si o matou itumalo ma nisi tagata o le atunuu i le tsunami, O le tsunami la e pei o le popole sa i ai, e lua vaiaso talu ai, e sau tonu lava le mafuie lea na uma atu nei. E moni e le i oo i le tapulaa foi lea e alert le atunuu pe faailoa atu i le atunuu. Ae na sau loa le mea lena, sa ou faapea po o le isi 5 i le 10 minute te i ua appear mai se mea faapea, breaking news. Aua le popole nonofo lelei pea ma matamata le lakapi e leai se tsunami. Aua e pei o le mea lena na ou faitio ai ananafi. Ae ui i lea, manino le faamalamalama a le Palemia aemaise foi o le Ofisa, faafetai atu mo faamoemoega. E pau lava lau tuualalo, pe tsunami pe le tsunami ae manaia le sau i le breaking news. O lea ua uma ona tolaulau atu o le telefoni o le leitio o le tv o le facebook, o a uma lava mea e sau ai, fai mai, aua le popole e leai se tatou tsunami. Aua o ia fuainumera, e i ai sa ta fua faatautau ta te alu ma feaveai, o le **meter scale** lea ua sau ua fia? O lona uiga ua tataua ona e tamoe i le mauga. O le mea taua lena o le faalauiloa,

faalauiloa mai. Pe tsunami pe le tsunami ae manaia lava le logo pea o le atunuu ma le faaaloalo.

Ona oo mai lea i le vaega lea na saunoa i ai le Palemia o le fuaga lea o le malosi. O lea e maua atu e i ai a tatou fua mafuie, po o tai ea i Mulinuu la e i ai fua mafuie. Ai lava se manaia pe ana avatu faataamilo i le atunuu atoa, Upolu ma Savaii, Manono ma Apolima ia le fua lea. Faataitai ona avatu se mea e lulu e fai ai le mafuie, o le malosi lea e fia, faataei ma nai ipu e fai ai se faataitaiga. Ona manatua lava lea e tagata, aua e faigofie ona **send in** iloa ai e tagata le mea lea e tupu. A o lenei mea fai mai e nonofo ma latou fua faatautau i tai e fua ai le tsunami...ma le faaaloalo lau Afioga i le Palemia, e leai lava ma se isi e iloa na mea po o le a malosi o le **meter scale** o le mea.

Ma faaiu atu ai, o le mea e atuvale le loto o le popolega, sau le Faataoto, o tagata ua fananau mai, e saasaa ona aso, e tumu o ia i le atuatuvaale ma le popole. O le popolega foi lena sa i ai lo matou aiga. Si o matou nuu lea na ou tala ananafi, ua fetamoeai solo taavale, a o la ou te matamata i le lakapi, o le taaloga a Ausetalia ma Niu Sila, o le manaia o le taaloga, ae ua oti atoa le taaloga i le vevesi o taavale nei. Ua lau aluga, moega ua o tagata i uta, talu ai le tuai ona logo mai matou. O le faaaliga lea ma le faaaloalo, e aoga mea tutupu e fotuai ai le mafaufau.

Faaiu atu ai lea e faapea, ou te lagolagoina foi lauga a nai ou uso faa-faipule ia matou te sosoo, ma ou faapea atu ai. Ia manuia le Tulafono. O lea e faavae i le tau vevesi i le taeao, atonu o faamanuiaga lea o le Tulafono. Manuia le Fono.

**FOFOGA FETALAI:** Malo faafetai. Masalo po o i ai nisi mea e fia saunoa i ai, ua uma ona faamalamalama e le Palemia le tulaga o... Malie lau Afioga i le Taitai po o le Minisita e ana le Tulafono, toe toa-lua lava. Tulai mai le sui usufono mo Vaimauga.

**Afioga SULAMANAIA FETAIAI TAUILILI TUIVASA (Vaimauga Sasae):** Masalo e le i faia foi se sao o lenei itumalo, ae momoli le agaga faafetai i lau Afioga i le Fofoga Fetalai, mo le faatautaiga o le sa o si o tatou atunuu. Faafetai i le Atua i le sao o lou tulai mai i lenei vaitau i le vevesi o si o tatou atunuu o lo o i ai, e ala i le taitaina o Samoa i le Fonousu. Ae ua malu ma lelei mea uma e ala i lau taitaiga, ia faamanuia le Atua i lau Afioga i le Fofoga Fetalai.

Faatalofa foi i sui usufono i le la itu o le Maota, afio lau Afioga i le Palemia po o le Taitai foi o le Malo po o le Taitai foi o le Maota. Vasega o Minisita, Minisita Lagolago, faafetai i le galueaina o si o tatou atunuu i le faatautaiga o le sa o Samoa. O lea ua tatou i ai i le masina 11, ua api foi le uli. Ae o lea lava o lo o malu le sa o Samoa e ala i la outou taitaiga. Manaia le tala a le Palemia, ou te fia faalogologo lava i ai pe a saunoa, o ana Minisita e galulue faataulelea, e ese le manaia o lea tulaga. E oo mai lava i le taeao lenei, o lea

e le o aafia Samoa i mala faale-natura aemaise foi o le faamai oti, ona o la outou taitaiga ma le malupuipua e ala foi i tatalo a le atunuu.

O lenei itula e momoli le agaga faafetai, i le Afioga i le Minisita aemaise foi o le Minisita Lagolago, aemaise foi o le Ofisa Sili ma le Pulega o lenei Matagaluega o le Punaoa Faale-natura. A matau foi i le tulaga sa i ai lenei Matagaluega o le Vaaitau. O lea e maua sa i lalo foi o le Matagaluega o Faatoaga, ina ua tuuese foi e Siamani, na taua foi pe ua 118 tausaga talu ona faavae lenei Matagaluega. O lea foi sa i ai le tausaga po o le 1980 sa i lalo o le Matagaluega o Faatoaga. Po o le 2003 lea na toe tuu mai ai lalo...o lo o feaveaveai pea lenei Matagaluega. Ae o lo o matau, e ese le taua o lenei Tulafono ma lenei Matagaluega o si o tatou atunuu. Leaga o tatou o le atunuu lea e lata i le sami, mala faale-natura. O lenei Tulafono e matuai lagolagoina e lou itumalo. Ua leva ona tatau ona fai. Ona o le a? o le soifua ma le malu puipua o si o tatou atunuu. Tatou te lumafale i moana ae tuafale i papa, le sami. Ae o lou fiafiaga o lea ua faataunuu lenei Tulafono, e pei o le tele o taimi i lenei Maota, ou te lauga ai lava. O si ou itumalo, aemaise lava le sami, o le moana e leai ni aau. A sau nei le mala faale-natura ae feosofi atu i tua ae pa mai ma le vai. Ia e leai lava se mea o faia e oo mai i le taeao lenei. E pei o le agaga lena o lou lagolagoina o lenei Tulafono, ina ia galulue ai Matagaluega uma lava. Ou te lagolagoina le mataupu lena, o lea e faasau ai, e amata mai i le s seia oo ifo i le v. O le galulue faatasi ma le faalauiloa. O le a foi le manaia o lenei Tulafono Tau Faaofi, ae a le lava le faalauiloa e le Matagaluega o le atunuu, e leai lava se mea e tupu. O lea faatoa ou iloa au ia, e i ai vaega a oo i ai le lulu e leai, e faapena...Ae manaia le talosaga atu i lau Afioga i le Minisita o le Matagaluega, e manaia le aoao o le tulaga lea i totonu o aoaoga. O le 6.4 agai i le 7.4 o fautuaga. O le 7.5 agai i luga, o ese loa ma tuua. Ina ia feola mai lava tamaiti ua iloa le malosiaga lea. E oo foi i le tulaga i luga o le leitio e tatau foi ona fai ni faalauiloa, e tatau foi ona fai ni a outou polokalame i luga, ina ia faalauiloa pea i le atunuu. Aua o le mea lea e i ai, e tele Tulafono ia e fai, ae le o oo tonu lava le ooooga i e faagalueaina ma e o lo o nonofo i totonu o afioaga. Na o tatou lava ma e...a o le agaga o le sui usufono, ia lava le faalauiloa o si o tatou atunuu, ia lava le faalauiloa ia oo aoaoga i totonu o tatou afioaga ma alalafaga. O le isi foi tulaga, o mea ia o auala alo, ou te le talanoa i le aotelega a o si ou itumalo o Vaimauga, tatou te iloa e lumafale lava i le sami. Ae manaia nei Tulafono se i e silasila ifo, o le agaga lea e tau avatu ai, o le Tulafono lea e aumai, e faapea galulue uma ma isi Matagaluega. Se i silasila lau Afioga i le Minisita o Felauaiga i auala alo ia, aemaise, o lea ou te talanoa atu i lou itumalo, si ou nuu lea o Fagalii. Tou te silafia o le sami, a faapea e oso le tsunami ae faapea e i ai taavale e feaveai ai tagata matutua. E o lava kami ifo i Vaivase aua e leai se auala alo atu i totonu, faapea foi i si ou nuu o Vaialele. Ae pe mafai ona, a ua le mafai ona fai ni auala i luga o mauga, ia o auala alo lava i totonu o lou itumalo, avatu ai ma i Moataa. Aua e tu lata i le matafaga. E

leai la ni auala alo e pei e alu ai le taavale. Ae pei o le agaga o lenei Tulafono. Lau Afioga i le Fofoga Fetalai, e lagolagoina e lenei sui usufono, ae ia lava le faalauiloa i le atunuu, ina ia oo i ooooga i tagata e i ai. Ma lou faaaloalo lava.

**FOFOGA FETALAI:** Malo, vagana e i ai se isi mea e ese mai ai e fia saunoa i ai lau Afioga i le Minisita. E i ai le manatu...faamalulu atu Peseta ona o le lua Tulafono ma le toeaina, aua o oe o le Minisita Lagolago.

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:**

Lau Afioga i le Fofoga Fetalai, ou te tulai atu ma le agaga faaaloalo, e momoli atu le faafetai i sui mamalu uma sa saunoa i le Tulafono lenei. Ma o lea lava ou te matau, o le tulaga lava lea i le faailoilo ina ia vave ona silafia e tatou tagata, ia se mala o le a tulai mai. E le gata i se mafuie, ae faapena foi i se tsunami pe a mavae atu se mafuie tele. O le tulaga foi lea ou te matau i saunoaga ua aumai, pei e agai tele i faailoilo foi lea, e le gata i faailoilo e alu atu i le Ofisa, ae o faailoilo masani ai ia natura ua tatou masani ai. O lea e i ai lona faa-Peretania o le **Modified Mercalli Scale** po o le MMS po o le **MOMOSI** po o le **MOMOSA** po o le **MOMOSO** foi. O le uiga o le mafaufauga, lea na saunoa manino ai ia le Afioga i le sui usufono mo Anoamaa i Sasae ia Fonotoe faapea foi le Afioga ia Faumuina Tiatia. O le tulaga foi lea i mea tutupu i lo tatou olaga ua tatou masani ai. Masalo o le mea taua lava e tutupu i lo tatou olaga ua masani ai, e faigofie ona manino ai le mataupu lea, o le tulaga lea e masani pe a oo ina taaliligia le matagi. E emo loa le uila pa le faititili faapea loa ma le loomatua ma le toeaina, oh.. ua uma faaletonu, ua uma tau leaga, ua oo mai le tau lelei o lea ua taaliligia le matagi i le emo o le uila ma le pa tu'i o le faititili, o mea na tatou masani ai. Lau Afioga, po o le a lava le ituaiga fale, po o le fale Samoa po o le falepapalagi, e lulu loa le mafuie i le tulaga lea e ono oso ai se tsunami, o le a lava le mea e **oii**, pe e te moe gase, e lulu lava le fale lulu le moega, lulu le...o a lava mea, e tele lava mea, o ata o mea tautau o Losalio, o a igoa. E leai lava se mea e lue e le pao. Ma o le pao la lena e fafagu ai i tatou, e fesoasoani ai ina ia fai se gaoioiga, e muliai la fesootaiga ia, ae fua lava i mea ia, e tai oo ai lava ina taei faamalama. E tau leai lava se fale e leai ni faamalama. O le tulaga foi i mafuie, o lea ua tatou iloa le mafuaaga o mafuie. I le taimi lenei o nuu uma lava ma le sami, o lo o tietie i luga o papa tetele i lalo ifo, o papa na a feseetai ona lulu lea. E i ai la le mea tele lea e taoto i le va o tatou ma Toga, o le vanu. O le vanu tele lava lena faasasao mai lava i Toga, masalo e na o ni nai 100, fia 100 mita, i tai o Aleipata. O le alu atu lava lea i le itu i Toga.

O i la i totonu i i, e tulata i le vanu lea, lea e masani ona lulu ai mafuie. E tutupu mai ai mafuie ma o lea e masani ai foi ona tele ia fale e faaleagaina i le itu i Saute o Upolu.

O le tulaga la lena lau afioga e pei ua lauiloa lava ia vaega e ono aafia i mafuie. O le mafuie muamua lava ma tsunami na ou iloaina, faatoa ou experience ina, o le mea na tupu iinei i Apia i le tausaga 1952. A o ou tafaovale solo ai lava, nofo aoga, na sau ai le faasalalauga, o le igoa o le tsunami i le taimi lena o le galuafi. Ia e leai se isi na vaai i lea mea o le galuafi.

Na tumu uma ia le... e pei o le mea lea na saunoa i ai ia le sui usufono ia Fonotoe, na tumu uma i i le taulaga. Na matua tumu, e fia matamata i le mea e igoa o le galuafi pe se galu e na o le afi lava e sau, ae matou tetei i le vaai atu, e leai ua amata muamua i le mimiti atu o le sami, seia oo lava ina leai se sami. E oo i le aau ua mago, ia toe sau loa, ia o le sau la lena o lea faatoa malamalama ai, ia o le mea la lea e igoa o le galuafi, e leai se afi. Ia ona sau lava lea o lea ou te tutu foi au i luga, o ou laitiiti lava, ia na napa lava i ou alofivae, ia toe alu. E pei e faaono lava ona alu atu toe sau, alu atu toe sau, alu atu toe sau, ia o le malosi lena o le galuafi na matou vaai muamua lava na ou faalogo i le tele o tagata i le taimi lena e sau i luga o le 2AP, faatoa vaai lea o Samoa i se mea faapea.

O lona uiga e le i i ai lava ia ni galuafi faapea muamua, ae o lea la ua o tatou vaai i le matautia o le mea lea, i le tausaga e 2009, na oti tagata. O lea la ua tatou talanoa lau afioga i le Tulafono ma aiaiga uma lava, o lea e faataua ai mea ia e sausaunoa i ai ia outou afioga. Ia ma o lea foi e i totonu o le tatou Maota nei ia le aufaigaluega e latou te faamaumauina ia finagalo ua faaalua. Ae mo au lava ia ma le Malo, e momoli atu le faamalo i a outou fautuaga lelei, o le a limataitaiina ai foi lenei lala o le tatou Malo, ona o le tulaga lenei o le mala e pito i matautia lea ua feagai nei ma le tatou paneta.

Ia o le tali atu lena faaii.

*Na faamaonia le lafo ma faitauina le Tulafono Tau Faaofi o Auaunaga o le Vaai Tau, Suesuega Faasaienisi o Eleele ma le Osone 2020 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu ia le Tulafono Tau Faaofi i le Komiti o Vaega o Atinae Eseeese mo le iloiloaina ma toe lipoti mai i le Fono Aoao i se Fonotaga o lumanai.



**TULAFONO TAU FAAOFI O TEUTEUGA O LE TULAFONO O LE  
FAAMAUINA O PULE O FANUA 2020 – faitauga faalua.**

**FOFOGA FETALAI:** Ou te tapa lau afioga i le Taitai o le Maota.

**Susuga Hon TUILAEP AUELUA FATIALOFA LUPESOLIAI  
LOLOFIETELE NEIOTI AIONO GALUMALEMANA Dr. SAILELE  
MALIELEGAOI:** Lau afioga i le Fofoga Fetalai ou te faatu le lafo, *Ina  
ia faitauina nei le Tulafono Tau Faaofi o Teuteuga o le Tulafono o le  
Faamauina o Pule o Fanua 2020 i lona faitauga faalua ma ou te fia tautala  
faamalamalama i ai.*

*Na faaluaina e le Minisita o Tina & Tamaitai, Atinae o Nu'u ma Afioga  
ma Agafesootai ma le Minisita o Pisinisi, Alamanuia ma Leipa.*

**FOFOGA FETALAI:** Ia, tulai mai lau Afioga, i se saunoaga  
faamalamalama.

**Susuga Hon TUILAEP AUELUA FATIALOFA LUPESOLIAI  
LOLOFIETELE NEIOTI AIONO GALUMALEMANA Dr. SAILELE  
MALIELEGAOI:** Lau Afioga i le Fofoga Fetalai, o le Tulafono lenei, e na  
o le 2 lava fuaiupu, e puupu'u ia o le fuaiupu, e na o le 2 lava fuaiupu. E pau  
lava le suiga, o le suiga o le fuainumera i le 12 i le 17 uma. E pau lea.

O le agaga atoa o le Tulafono, o le mafai lea ona tuu atu se faaumiumiga e  
5 tausaga, mai i le aso na amata faamamaluina ai le Tulafono, e muta ai le  
aoga o le Tulafono, lea e muta i le aso 21 o Mati 2021.

O Tulafono nei o le faamauina o pule o fanua e faasino tonu lava lea, i le  
faamauina po o le lesitalaina o fanua taupalagi po o fanua umia saoloto. O  
le fuafuaga sa i ai, e tataua ona uma le 12 tausaga na pasia ai mai i le 2008,  
ua maea uma ona lesitala po o le faamau i le lesitala o fanua umia saoloto.  
O fanua ia tau papalagi uma i totonu o Samoa ae peitai ane, o lea ua tulata i  
le taimi e muta ai le Tulafono ia Mati o le tausaga fou, o lea e le i maea ona  
lesitala fanua ia umia saoloto.

E aofia ai i totonu o fanua nei, nisi o fanua o tagata taitoatasi umia saoloto.  
O le tele foi o nisi o fanua o esetete, o tagata foi ia ua maliliu, ia ae tuu mai  
i a latou fanua ia o latou fanua. Ia o le faalavelave, ua taaapeape fanua i  
atunuu mamao. Ua fiu la e toe faamaopoopo mai, o isi ua i Amerika o isi ua  
i Peretania. Ua faigata ai lava ona tuufaatasi i latou i se maliega e faatatau i  
o latou fanua, i le faiga o le a fai ai po o le a vaevae loa.

O lea la e le o maoti ia le tulaga lena, e ao ai ona toe tuu avanoa ia le tatou  
Malo i ai latou ia e ana ia fanua umia saoloto, ina ia faamaioio lelei ia ma  
aumai loa e lesitala. Ae manatua foi i le faiga muamua sa i ai, sa faaoga mo  
mea o deeds, i mo mea o fanua nei e lesitala e mafai ona faatau atu. Ia talu

ai la le faigata sa faafeagai ma loia, Ofisa o Loia e faamautu faatauga fanua, lea sa faamau le ownership po o e puleaina fanua mo mea o pepa, o deeds, o pepa o fanua, talu ai ona ua leiloa le tele. Ia o le ala lena o lea ua agai ai le tele o atunuu o le lalolagi, e faaoga le system lea o le Torrent System, e lesitala ai fanua na i lo le tau tusia i lalo o deeds.

O lea la na pasia ai le Tulafono lea i le 2008 mo fanua ia umia saoloto. O lea la ua oo mai i le taimi lenei, ma faamuta ia Mati i le 2021. O lona uiga, ua tataua ona fai se faiga nei ae e le i oo atu i le taimi lea e taape ai le tatou Palemene, ia ma le toe mafai ai ona toe fai se isi faiga. Ae tataua loa ona fai se suiga ina ia suia le fuainumera lea o le 12 tausaga na faataoto mai ai, e uma ai le malosi o le Tulafono mo le lesitalaina. Ia ae toe faaopoopo i ai se isi 5 tausaga ona 17 ai lea, ina ia tuu avanoa i ai latou nei o nisi o tagata foi e ana foi fanua nei, o nisi o tagata taitoatasi sa faatau nai a latou kuata eka, i taimi foi na amata mai ai o faatau, ese mai ai i le faiga lea ua i ai nei ua lisi.

Ia o latou la na, o lea o isi e le i maea lava ona motu a latou fanua. Ia a o isi o faalapotopotoga ma ekalesia o lo o tau faamaopoopo ona o le tulaga foi lea lau afioga, i le tele o ekalesia, ia na ona fai o foai a nuu i ekalesia i fanua, ae e le i fuaina. Ia ma faamaape ma tusia ai loa i totonu o le lesitala. Ia o le ala lea ua mafua ai le teuteuga. O le teuteuga la lenei, e na o le sui lava o le numera 12 i tausaga lea na tuu atu i ai, lea e uma nei ia Mati o le tausaga fou, ae tuu loa i ai le 17 ia toe maua ai le isi 5 tausaga e galulue ai le Ofisa o Fuafanua e fai faasalalauga ma faamanatu i ai latou, o lea ua toe tuu avanoa atu le Malo, e aumai loa ia latou fanua umia saoloto e lesitala.

Lau Afioga i le Fofoga Fetalai, ia e faigofie lava ia le Tulafono.

**FOFOGA FETALAI:** Ia, atonu o lea ua manino auofala ma ua malamalama ia le mataupu. E i ai foi le manatu ia na faale foi e le Palemene i le tatou mafutaga ananafi. Ia ona i ai lea o le talitonuga, ua manino ma malamalama. E i ai se isi e fia saunaoa?

*Na faamaonia le lafo ma faitauina le Tulafono Tau Faaofi o Teuteuga o le Tulafono o le Faamauina o Pule o Fanua 2020 i lona faitauga faalua.*

**FOFOGA FETALAI:** E tusa ai ma Tulafono Tumau, o le a tuuina atu le Tulafono Tau Faaofi o le Teuteuga o le Tulafono o le Faamauina o le Pule o Fanua 2020 i le Komiti o Vaega o Atinae Eseeese mo le iloilo ina ma toe lipoti mai i le Fono Aoao i se Fonotaga o lumanai.

Ia tasi lea avanoa lea o le a toe ave i le Komiti e maua ai avanoa o sui usufono mamalu ae faapena foi le atunuu i le faafofoga mai.

**TULAFONO TAU FAAOFI E FUAFUA TATAU AI LE AVA  
MALOSI 2018 – iloiloga auiliili.**

**FOFOGA FETALAI:** E tusa ai ma Tulafono Tumau, e ao ona faamaonia muamua e le Fono Aoa le lipoti a le Komiti i le Tulafono Tau Faaofi ona faatoa sagai atu lea mo le iloiloga auiliili.

Ou te tapa ma le faaaloalo lau Afioga i le Taitaifono o le Komiti o le Vaega tau i le Tamaoaiga lau Tofa i le matua Lauofo.

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai, ina ia faagasolo le Tulafono Tau Faaofi e Fuafua Tatau ai le Ava Malosi 2018 faatasi ma Teuteuga ma Faasaoga.*

*Na faaluaina e le Sui Usufono o Palauli le Falefa ma le Sui Usufono o Aleipata Itupa i Lalo.*

*Na faamaonia.*

**FOFOGA FETALAI:** O lea ua faamaonia e le Fono Aoa le lipoti a le Komiti ma o le a sagai atu loa mo le iloiloga auiliili o le Tulafono Tau Faaofi. E tusa ai ma Tulafono Tumau, e amata le iloiloga auiliili i le Fuaiupu e 2.

**FUAIUPU 2: Sini ma le faaogaina o le Tulafono.**

*Faamaonia.*

**FUAIUPU 3: Faamatalaina o uiga o upu.**

**FOFOGA FETALAI:** O lo o i ai le teuteuga a le Komiti i le fuaiupu e 3. Tulai mai lau afioga i le Taitaifono o le Komiti.

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai ou te faatu le teuteuga i le fuaiupu e 3 e faapea:

**“TEUTEUGA:**

**Fuaiupu 3:**

- (a) Mo le faamatalaina o le uiga o upu “ava malosi ua filogia”, ia suia le faailoga piriota i le faailoga semi kolona ma faaofi le faaupuga ua taua i lalo i le tuanai ai o le parakalafa (c); po o (d) so o se isi lava vailaau ua faatonuina e Tulafono faatonutonu, ua avea ma ava malosi ua filogia.”
- (b) Mo le faamatalaina o le uiga o le “ava malosi” i le parakalafa (c) i le tuanai ai o upu “meainu mai le sua o apu faamafu”, ia faaofi upu “meainu o iai le ava malosi ia saunia e inuina”.
- (c) Mo le faamatalaina o le uiga o “fale kalapu”, ia suia e faapea “fale kalapu” o lona uiga o se nofoaga ma fale ua laiseneina lea e totogi le totogifuapauina o le ulufale ma e i ai o sona fola taalaelae ua faatulagaina e sisiva ai ma faatautaia ai soo se isi lava gaiogiga e pei ona faatonuina e Tulafono Faatonutonu po o e pei ona fuafuaina e le Komiti Faatino;”
- (d) Ia faaofi le faamatalaga fou lenei i lona faasologa i le pi faitau faaperetania:- “pa pia” o lona uiga o se nofoaga ma fale ua laiseneina e le o totogiina se totogifuapauina o le ulufale ma e leai sona fola taalaelae ua faatulagaina e sisiva ai ma faatautaia ai o soo se isi lava gaiogiga e pei ona faatonuina e Tulafono Faatonutonu po o e pei ona fuafuaina e le Komiti Faatino.”

**Tofa LEALAILEPULE RIMONI AIAFI:** Lau afioga i le Fofoga Fetalai.

**FOFOGA FETALAI:** A, malie lava le Fono Aoao, se i tulai mai lava le sui usufono o Faleata Sisifo.

**Tofa LEALAILEPULE RIMONI AIAFI:** Fia malamalama i le Vaega lea suiga a le Komiti mamalu. O lona uiga i le finagalo o le Komiti mamalu, seiloga e i ai se nofoaga foi lea e fai ai siva, ona faatoa tau lea o se fale kalapu? A leai se mea e sisiva ai tagata e le o se fale kalapu? Ma le faaloalo lava.

**Tofa Hon LAUOFO FONOTOE NUAFESILI PIERRE LAUOFO:** O lea lava lau afioga, faafetai.

**FOFOGA FETALAI:** Ia, malo.

*Faamaonia le Teuteuga.*

*Faamaonia le Fuaiupu e 3 e pei ona Teuteuina.*

**FUAIUPU 4: Komiti Faatino e Fuafuaina Tatau le Ava Malosi.**

**FOFOGA FETALAI:** O lo o i ai le teuteuga a le Komiti i le Fuaiupu e 4. Tulai mai lau afioga i le Taitaifono.

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai, ou te faatu le Teuteuga i le Fuaiupu e 4 faapea:

**“TEUTEUGA:**

**Fuaiupu 4(1)(a)**

i le tuanai ai o le fuaiupu ia faaofi le (g) e faapea

**“(g) o le Ofisa Sili o Pulega o le Faalapotopotoga o Suesuega Faasaïenisi a Samoa po o lona sui,” ma ia toe iloilo le parakalafa o lo o totoe.”**

*Faamaonia le Teuteuga.*

*Faamaonia le Fuaiupu 4 e pei ona Teuteuina.*

**FUAIUPU 5: Galuega tauave a le Komiti Faatino.**

*Faamaonia.*

**FUAIUPU 6: Malosiaga o le Komiti Faatonu.**

*Faamaonia.*

**FUAIUPU 7: Failautusi o le Komiti Faatino.**

*Faamaonia.*

**FUAIUPU 8: Tuuina atu o malosiaga o le Komiti Faatino.**

*Faamaonia.*

**FUAIUPU 9: Fonotaga a le Komiti Faatino.**

*Faamaonia.*

**FUAIUPU 10: Fofogaina o mataupu e le Komiti Faatino.**

*Faamaonia.*

**FUAIUPU 11: Tulaga faataatia o faamaoniga.**

*Faamaonia.*

**FUAIUPU 12: Malosiaga o le Ofisa Sili o Pulega.**

*Faamaonia.*

**FUAIUPU 13: Tuuina atu o malosiaga e le Ofisa Sili o Pulega.**

*Faamaonia.*

**FUAIUPU 14: Faatau atu o le ava malosi e aunoa ma se laisene.**

*Faamaonia.*

**FUAIUPU 15: Ava malosi ua filogia.**

*Faamaonia.*

**FUAIUPU 16: Faatauina atu po o le tuuina atu o le ava malosi i se tagata e i lalo ifo o le 21 tausaga le matua.**

*Faamaonia.*

**FUAIUPU 17: E manaomia le faamaoniga o le matua i tausaga.**

*Faamaonia.*

**FUAIUPU 18: Faatauina po o le tuuina atu o le ava malosi i tagata onana.**

**FUAIUPU 19: Taumafaina o le ava malosi i nofoaga faapitoa.**

**Tofa Hon LAUOFO FONOTOE NUAFESILI PIERRE LAUOFO:**  
Lau afioga i le Fofoga Fetalai, e i ai le teuteuga a le Komiti i le fuaiupu e 19.

**FOFOGA FETALAI:** Faamalulu atu.

*Faamaonia le Fuaiupu 18.*

**FOFOGA FETALAI:** O lo o i ai le teuteuga a le Komiti i le fuaiupu 19 (2) b & (3). Tapa lau afioga i le Taitaifono o le Komiti.

**Tofa Hon LAUOFO FONOTOE NUAFESILI PIERRE LAUOFO:**  
Lau afioga i le Fofoga Fetalai ou te faatu le Teuteuga i le fuaiupu 19 e faapea:

**“TEITEIGA”**

**Fuaiupu 19(2) & (3):**

(2) Ia suia le faasinomaga i le “(2)” i le “(1)”.

(3) mo le faafuaiupu (3) i le tuanai ai o le upu “o se aoga”, ia faaofi faamatalaga fou e faapea:

**“galuega tauave aloaia” o lona uiga o se galuega tauave o lo o fautuaina e Tulafono faatonutonu.”**

**FOFOGA FETALAI:** Malo Faafetai.

*Faamaonia le Teuteuga.*

*Faamaonia le Fuaiupu 19 e pei ona Teuteuina.*

**FUAIUPU 20: O le i ai o tamaiti i nofoaga ma fale ua laiseneina.**

**Tofa LEALAILEPULE RIMONI AIAFI:** Lau afioga i le Fofoga o le Fono...

**FOFOGA FETALAI:** Ia, se i tulai mai ia le sui usufono o Faleata Sisifo.

**Tofa LEALAILEPULE RIMONI AIAFI:** E fia fesili lava i le vaega lea o le Tulafono. O le a se, o lea ou te faitau atu i iuga fono a le Komiti, e pei e le talafeagai ia le vaega lea. Aua o lea e na o le tagata e 21 agai i luga e faataga e le fale kalapu, ae o lea e i ai le avanoa e faataga ai i latou e 18 tausaga e faigaluega. Tusa lava pe under supervision, i lalo o se vaaiga a se isi tagata e 21 tausaga. Ia, ou te le o mautinoa po o le a le se silasila a le Komiti i lea mea pe talafeagai?

**Tofa Hon LAUOFO FONOTOE NUAFESILI PIERRE LAUOFO:** Faafetai i lau afioga i le Fofoga Fetalai.

**FOFOGA FETALAI:** Malo, Faafetai. Tulai mai le Taitaifono.

**Tofa Hon LAUOFO FONOTOE NUAFESILI PIERRE LAUOFO:** Ia o le Fuaiupu 20 e leai se teuteuga a le Komiti o faia i ai. Ia ae o le a taumafai e tali atu. O le vaega tonu lea o le vaega lea e i lalo o le 18 tausaga, manatua foi o lo o i ai nai aoga foi ia e pei o le APTC, o lo o aoga la nai tamaiti ia i le matafaioi ia. O lea la e pei e tatala e le Tulafono le avanoa, e fai ai ia nai a latou training.

Ae e le faapea ua faigaluega tumau e le i ausia ia le 21. Ia o le mafuaaga lena o le vaega lea o le Tulafono. O le tali lea lau afioga i le Fofoga Fetalai.



**FOFOGA FETALAI:** Malo, ia se i toe tulai mai ia le sui usufono.

**Tofa LEALAILEPULE RIMONI AIAFI:** Faafetai o le uiga o le training po o le aoaoga lea e saunoa i ai le afioga i le Taitaifono, o le ao o le inu? Ma le faaaloalo lava.

**Tofa Hon LAUOFO FONOTOE NUAFESILI PIERRE LAUOFO:** Ia, o le a ou le tali atu i le fesili. O la e silafia le tali o lana fesili.

**FOFOGA FETALAI:** Ia malo Faafetai. Ia ma o la e soiso'i foi ia le sui usufono e ana le fesili.

*Faamaonia le Fuaiupu 20.*

**FUAIUPU 21: Vasega o laisene.**

*Faamaonia.*

**FUAIUPU 22: Manaoga mo talosaga o laisene.**

**FOFOGA FETALAI:** O lo o i ai le teuteuga a le Komiti i le Fuaiupu 22. Lau afioga i le Taitaifono tulai mai.

**Tofa Hon LAUOFO FONOTOE NUAFESILI PIERRE LAUOFO:** Lau Afioaga i le Fofoga Fetalai ou te faatu le Teuteuga i le Fuaiupu 22 e faapea:

**“TEUTEUGA:**

**Fuaiupu 22(1):**

Ia aveese le parakalafa (e) ma ia faapena ona toe iloilo le parakalafa o lo o totoe.

*Faamaonia le Teuteuga.*

*Faamaonia le Fuaiupu 22 e pei ona Teuteuina.*

**FUAIUPU 23: E mafai e le Failautusi ona manaomia nisi faamatalaga.**

*Faamaonia.*

**FUAIUPU 24: O mataupu e ao ona iloiloina e uiga i talosaga mo laisene.**

*Faamaonia.*

**FUAIUPU 25: Faamatuu atu po o le teena o se laisene.**

*Faamaonia.*

**FUAIUPU 26: Tuutuuga o laisene.**

**FOFOGA FETALAI:** O lo o i ai le teuteuga a le Komiti i le Fuaiupu 26. Tulai mai lau afioga i le Taitaifono.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le Teuteuga i le Fuaiupu 26 e faapea:

**“TEUTEUGA:**

**Fuaiupu 26:**

(a) I le tuanai ai o le fuaiupu 26(2) ia faaofi se faafuaiupu (3) fou e faapea:-

“(3) O le a avea ma tuutuuga o se laisene pa pia ma se laisene o se fale kalapu e faapea e ao i Le ona le laisene ona faafaigaluegaina tagata e avea ma tagata faigaluega tau i le puipuiga malu, o i latou ia:

(a) e amio lelei ma tauleleia; ma

(b) e le’i faamaonia o se moliaga faaetulafono i se soligatulafono matuia; ma

(c) ua maea ona faatino o aoaoga talafeagai i galuega tau le  
pui puiga malu; ma  
(d) so o se isi lava tuutuuga ua faatonuina e tulafono  
faatonutonu,”

*Faamaonia le Teuteuga.*

*Faamaonia le Fuaiupu 26 e pei ona Teuteuina.*

**FUAIUPU 27: Umi o le taimi e aoga ai se laisene.**

*Faamaonia.*

**FUAIUPU 28: Faafouga o se laisene.**

*Faamaonia.*

**FUAIUPU 29: Faaliliuina atu o se laisene.**

*Faamaonia.*

**FUAIUPU 30: Fesuiaiga ma le toe fesiitaiga o nofoaga ma fale ua  
laiseneina.**

*Faamaonia.*

**FUAUPU 31: Aia tatau ua faaee atu i laisene lē tumau.**

*Faamaonia.*

**FUAIUPU 32: Talosaga mo se laisene lē tumau.**

*Faamaonia.*

**FUAIUPU 33: Taiala mo le faamatuuina atu o se laisene lē tumau.**

*Faamaonia.*

**FUAIUPU 34: Faamatuuina atu po o le teena o se laisene lē tumau.**

*Faamaonia.*

**FUAIUPU 35: O aso e le faatagaina ai le faatauina atu o le ava malosī.**

**FOFOGA FETALAI:** O lo o i ai le teuteuga a le Komiti i le fuaiupu 35. Tulai mai le Taitaifono o le Komiti.

**Tofa Hon LAUOFO FONOTOE NUA FESILI PIERRE LAUOFO:** Lau Afioga i le Fofoga Fetalai ou te faatu le teuteuga i le fuaiupu 35 e faapea:

**“TEUTEUGA:**

**Fuaiupu 35(3)(d):**

I le tuanai ai o upu “faafilemu ai le pisapisao”, ia faaofi upu: “lea e aofia ai, e tusa ma faiga faavae a le Ofisa o Fuafuaga ma le Puleaina o Taulaga i le faafoega o le pisapisao.”

*Faamaonia le Teuteuga.*

*Faamaonia le Fuaiupu 35 e pei ona Teuteuina.*

**FUAIUPU 36: Faiga e faatonutonu ai le gaosiga o le ava malosī.**

*Faamaonia.*

**FUAIUPU 37: Talosaga a se kamupani mo se laisene e gaosia ai le ava malosi.**

*Faamaonia.*

**FUAIUPU 38: Taiala mo le faamatuuina atu o se laisene o se kamupani e gaosia ai le ava malosi.**

*Faamaonia.*

**FUAIUPU 39: Tulaga faataatitia mo le gaosiga o le ava malosi.**

**Tofa LEALAILEPULE RIMONI AIAFI (Faleata Sisifo):** Lau Afioga i le Fofoga Fetalai...

**FOFOGA FETALAI:** Se i tulai mai le sui usufono mo Faleata Sisifo.

**Tofa LEALAILEPULE RIMONI AIAFI:** Ou te fia fesili lava i le Taitaifono lau Afioga, muamua, o mea ia o laisene o fale gaosi ava i le Afioga i le Taitaifono ma le latou Komiti o lea e vaai atu sa tele latou asiasiga sa fai, pe o i ai se tapulaa o nei mea o laisene tuuina atu. E tatau ona i ai se quota foi lea e tagai i ai pe o le mea o tuusaunoa.

Lona lua, o lea e manino i le tou Lipoti i le Vaega 7 le tele o le faaletonu o nisi fale gaosi ava lea e i ai lea e manino mai i le tou Lipoti. O le fesili la aua o lea ua oo tonu i le vaega lea o le standard. O le fesili la i le Komiti, o le a la se fautuaga a le tou Komiti aua o lea ou te fiu e vaai i fautuaga i tua i fale ia na outou asia lea e tele le faaletonu i le gaosiga o fagu malosi ia. Ma le faaaloalo lava.

**FOFOGA FETALAI:** Malo faafetai. Ia se i tulai mai le Taitaifono.

**Tofa Hon LAUOFO FONOTOE NUA FESILI PIERRE LAUOFO:** Lau Afioga o le tulaga lea i le quota po o le numera o laisene tuuina atu i mea o fale ava malosi o lo o taoto i lalo o le Komiti Faatino po o le Liquor Board, o latou e taunuu pe toai i ai talosaga ona iloilo lea o talosaga pe talafeagai le tuuina atu o le laisene pe leai.

O le tulaga lea mo standards alcohol, e sao le sui usufono mamalu, sa matou asiasia le tele o fale ia o lo o gaosia ai le ava malosi i le tulaga lea o le mea o le spirit. E oo foi i fale gaosi pia sa matou asiasi foi i ai i le Taula ma le

Vailima. E sao e i ai fale ia ua uma ona ave i ai matou fautuaga ma lipoti i le Matagaluega ma le Liquor Board se i silasila lelei i ai i se galuega fai faatasi ma le Vaega o le Soifua Maloloina. O i o lo o logo mai foi matou e le Liquor Board, o lo o fai ma alu latou asiasiga i fale ia gaosi ava malosi. O lo o matauina e le Komiti o lo o i ai se vaega e tatau ona faaleleia, e tele lava le tulaga e tatau ona faaleleia i le tulaga o le silasila i le tulaga mo le saogalemu i le taumafaina e le atunuu o ava malosi ia. Ma o le tulaga lena o lea ua aiaia i le Tulafono lenei, o lea ua faataoto ai i i le tulaga foi lea i le manaomiaga mo standards, mea o alafua e tatau ona ausia i le lelei ona gaosi o le ava malosi mo le saogalemu i le tulaga foi i le soifua maloloina o le atunuu. E pei o tulaga ia. A o isi vaega o le auiliiliga o le faatinoga, ia o mea na e i lalo o le Tulafono Faatonutonu a le Matagaluega.

**FOFOGA FETALAI:** Malo faafetai. Malo foi le taulagalaga ua manino ai tulaga e pei ona asia e le Komiti ma a latou fautuaga. Malo faafetai i le sui usufono mamalu mo Faleata Sisifo, faafetai i le Taitaifono.

*Faamaonia le Fuaiupu 39.*

**FUAIUPU 40:** Faamatuu atu o se laisene o se kamupani e gaosia le ava malosi ma le umi o lona vaitaimi.

*Faamaonia.*

**FUAIUPU 41:** Faafouga o se laisene o se kamupani e gaosia le ava malosi.

*Faamaonia.*

**FUAIUPU 42:** Tuutuuga mo se laisene a se kamupani e gaosia le ava malosi.

**FOFOGA FETALAI:** O lo o i ai le Teuteuga a le Komiti i le fuaiupu 42. Tulai mai lau Afioga i le Taitaifono.

**Tofa Hon LAUOFO FONOTOE NUA FESILI PIERRE LAUOFO:** Lau Afioga i le Fofoga Fetalai ou te faatu le teuteuga i le fuaiupu 42 e faapea:

**“TEUTEUGA:**

**Fuaiupu 42:**

I le tuanai ai o le faafuaiupu (3) ia faaofi:-

“(4) O se tagata e ona se laisene, o ia lea ua faamatuu atu i ai o se laisene i lalo o lenei vaega ua na suia o lana metotia po o a latou metotia o le gaosia po o le fua faaaogaina mo le gaosia o le ava e aunoa ma le faamaoniga a le Komiti Faatino, ua ia faia po o ua latou faia o se soligatulafono.”

*Faamaonia le Teuteuga.*

*Faamaonia le Fuaiupu 42 e pei ona Teuteuina.*

**FUAIUPU 43: Solia o tuutuuga mo se laisene e gaosia ai le ava malos.**

*Faamaonia.*

**FUAIUPU 44: Faaulufaleina mai o le ava malos.**

**FOFOGA FETALAI:** O lo o i ai le teuteuga a le Komiti i le fuaiupu 44. Tulai mai le Taitaifono o le Komiti.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le teuteuga i le fuaiupu 44 e faapea:

**“TEUTEUGA:**

**Fuaiupu 44:**

(a) Mo le faafuaiupu (2) ia suia e faapea:

“(2) o le faafuaiupu (1) e le faaaogaina i se tagata ua 21 tausaga le matua po o le sili atu o ia lea ua ulufale mai i Samoa ma aumaia, e avea ma vaega o lana ia lava uta

atopau, o se fagu po o ni fagu o ava malosi o aofia ai ae le sili atu i lo le 2250mls i lona aofaiga atoa.’

- (b) Mo le faafuaiupu (3) ia aveese le faaupuga “ma i tupe totogi e le Matagaluega e nafa ma tupe.”

*Faamaonia le Teuteuga.*

*Faamaonia le Fuaiupu 44 e pei ona Teuteuina.*

**FUAIUPU 45: Talosaga mo se laisene e faaulufale mai ai le ava malosi.**

**FOFOGA FETALAI:** O lo o i ai foi le teuteuga a le Komiti i le fuaiupu 45. Lau Afioga i le Taitaifono tulai mai.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai ou te faatu le Teuteuga i le fuaiupu 45 e faapea:

**“TEUTEUGA:**

**Fuaiupu 45(2)(b):**

Ia aveese le faaupuga “le Vaega o Lafoga o Oloa e Gaosia i le atunuu a le.”

*Faamaonia le Teuteuga.*

*Faamaonia le Fuaiupu 45 e pei ona Teuteuina.*

**FUAIUPU 46: Faamatuuina atu o se laisene.**

**FOFOGA FETALAI:** O lo o i ai le teuteuga a le Komiti i le fuaiupu 46. Ou te tapa ma le faaaloalo lau Afioga i le Taitaifono o le Komiti.



**Tofa Hon LAUOFO FONOTOE NUA FESILI PIERRE LAUOFO:**  
Lau Afioa i le Fofoga Fetalai ou te faatu le teuteuga i le fuaiupu 46(3) e faapea:

**“TEUTEUGA:**

**Fuaiupu 46(3):**

Ia aveese le faaupuga “le Vaega o Lafoga o Oloa e Gaosia i le Atunuu a le.”

*Faamaonia le Teuteuga.*

*Faamaonia le Fuaiupu 46 e pei ona Teuteuina.*

**FUAIUPU 47: Tuutuuga mo se laisene e faaulufale mai ai le ava malos.**

*Faamaonia.*

**FUAIUPU 48: Toe faafouga o laisene e faaulufale mai ai le ava malos.**

*Faamaonia.*

**FUAIUPU 49: Solia o tuutuuga mo se laisene e faaulufale mai ai le ava malos.**

*Faamaonia.*

**FUAIUPU 50: Tulaga faatapulaaina o ituaiga oloa tau ava malos.**

*Faamaonia.*

**FUAIUPU 51: Manaoga mo le tusiaina o igoa o oloa tau ava malosi.**

*Faamaonia.*

**FUAIUPU 52: Faiga e faatonutonu ai le faasalalauga faatosina ma le faalauiloaina o le ava malosi.**

*Faamaonia.*

**FUAIUPU 53: Tausiga o le filemu ma le nofo lelei.**

*Faamaonia.*

**FUAIUPU 54: Fofogaina o mataupu e faasino i faitioga.**

*Faamaonia.*

**FUAIUPU 55: Taofia le tumau o laisene.**

*Faamaonia.*

**FUAIUPU 56: Faaleaogaina o laisene.**

*Faamaonia.*

**FUAIUPU 57: Tagata ofisa asiasi o le ava malosi.**

*Faamaonia.*

**FUAIUPU 58: Malosiaga e ulufale ai ma asiasiga.**

**FOFOGA FETALAI:** O lo o i ai le Teuteuga a le Komiti, faamolemole tulai mai lau Afioga i le Taitaifono.

**Tofa Hon LAUOFO FONOTOE NUA FESILI PIERRE LAUOFO:** Lau Afioga i le Fofoga Fetalai ou te faatu le teuteuga i le fuaiupu 58 e faapea:

**“TEUTEUGA:**

**Fuaiupu 58(1) & (2):**

Mo faafuaiupu (1) ma le (2) ia suia e faapea:

- (1). E mafai e se Leoleo po o se tagata asiasi o le ava malosi:
  - (a) I so o se taimi pe afai ua faatagaina le faatauina atu, tuuina atu po o le faaulufale mai o le ava malosi, i se laisene, ona ulufale ma asiasia nofoaga ma fale ua laiseneina mo le faamoemoe o le faamalosia o lenei Tulafono ma fuafua pe ua solia o so o se manaoga talafeagai i le laisene po o nofoaga ma fale ia ua laiseneina; po o
  - (b) Ulufale ma asiasi so o se nofoaga ma fale i so o se taimi pe afai e i ai ni mafuaaga talafeagai ua masalomia ai e faapea o lo o faatauina atu le ava malosi, tuuina atu po o le faaulufale mai faasolitulafono i nofoaga ma fale, po o e faapea o so o se isi lava soliga o lenei Tulafono, o lo o tulai mai pea.
- (2) E mafai e se leoleo po o se tagata asiasi o le ava malosi, i le noatia ma fai fuafua i le faamaoniga a le Komiti Faatino ona:-
  - (a) Ulufale ma asiasia o se nofoaga ma fale o lo o gaosia le ava malosi mo faamoemoega o le faamalosia o lenei Tulafono; po o
  - (b) Ulufale ma asiasia o se nofoaga ma fale o lo o gaosia le ava malosi pe afai o lo o i ai ni mafuaaga talafeagai e masalomia ai e faapea o lo o gaosia faasolitulafono le ava malosi i lea nofoaga ma fale, po o e faapea o so o se isi lava soliga o lenei Tulafono o lo o tulai mai pea.”

*Faamaonia le Teuteuga.*

*Faamaonia le Fuaiupu 58 e pei ona Teuteuina.*

**FUAIUPU 59:** Faatonuga mai tagata asiasi o le ava malosi po o leoleo.

*Faamaonia.*

**FUAIUPU 60:** Faamatalaga molimau o nisi o mataupu.

*Faamaonia.*

**FUAIUPU 61:** Malosiaga o le Komesina o Galuega Tau Leoleo a Samoa e poloaia e tapunia ai nofoaga ma fale ma isi.

*Faamaonia.*

**FUAIUPU 62:** O le tulieseina o tagata mai nofoaga ma fale ua laiseneina.

*Faamaonia.*

**FUAIUPU 63:** Faaaliga o le solia ai o le tulafono.

*Faamaonia.*

**FUAIUPU 64:** Faasalaga lautele.

*Faamaonia.*

**FUAIUPU 65: Solia o tuutuuga o laisene.**

*Faamaonia.*

**FUAIUPU 66: Tagata o i ai i nofoaga ma fale ua laiseneina mo faamoemoega faasolitulafono.**

*Faamaonia.*

**FUAIUPU 67: Faatauina o oloa tau ava malosi e le manaomia.**

**Tofa LEALAILEPULE RIMONI AIAFI:** Lau Afioga i le Fofoga Fetalai...

**FOFOGA FETALAI:** Se i tulai mai le Afioga i le sui usufono mai Faleata Sisifo.

**Tofa LEALAILEPULE RIMONI AIAFI:** Ou te fia fesili lau Afioga i le Taitaifono i le vaega lea 67 i le faaupuga, le Vaega 67(3). Muamua, e matua serious, e fai si tuga o le offence, o le solitulafono lenei, i le faatauina atu lea o se ava malosi, leai se laisene. Ae aumai le faasalaga faatusatusa i le tele o faasalaga mai le faasologa o le Tulafono, e fai si mamafa. A oo mai la i le solitulafono lea e fai si ogaoga, a o lea ua pau i lalo le fua o le faasalaga.

O le isi vaega, o le faaupuga e faapea mai, se oloa tau ava malosi e le manaomia, undesirable alcohol product. Ia, ou te le iloa, faatoa ou faitau lea i se ituaiga mea faapea, aua sa tatau ona faatuusao le faamatalaga, se ava malosi e le talafeagai mo le fofoga taumafa – unfit for human consumption. A o lea pei e, ou te le o malamalama po o le a tonu lava lea upu fai mai e le manaomia. Ia, o lau fesili lea ma le faaaloalo lava i lau Afioga.

**FOFOGA FETALAI:** Malo faafetai. Se i tulai mai lau Afioga i le Taitaifono o le Komiti.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, masalo o le fuaiupu lea o lo o agai tonu lava i le mea lea sa tulai mai, lea na faaulufale mai ai i le atunuu se container o mea fagu uisiki, e faafoliga mai o le ituaiga uisiki foi lea e masani ai tatou o le... a, ae faafoliga tutusa mea o label, misleading statements foi lea o mea o labels ia e aumai, ae le o le uisiki sao lea o le ituaiga uisiki lea, lea e i ai le

ituaiiga foi lea o le Red Label, le Scotch lea la na aumai ai ma faaulufale mai, o lea la na aumai e faapea e faatau atu i le atunuu, a o lea na taofia e le tatou Ofisa o le Tiute ma taofia ai loa tulaga ia, ona e le talafeagai ma le Tulafono.

**FOFOGA FETALAI:** Malo faafetai. Ia se i tuu atu le avanoa mulimuli i le sui usufono mo Faleata Sisifo.

**Tofa LEALAILEPULE RIMONI AIAFI:** Lau Afioga, faafetai lava, leaga o lea ua, e pei la sa tatau ona toe sui e le Komiti le heading i le vaega tonu lea o le Tulafono. Aua sa tatau la ona faapea mai le Tulafono, o le taufaavalea po o le tau faasese, po o le fake po o a mea ia... ae na pau lava le mea lea e sau ai i i, o le ava malosia e le manaomia. Ae afai e le afaina, aua foi aua... ma le faaaloalo lava.

**FOFOGA FETALAI:** Se i tulai mai pea le Taitaifono.

**Tofa Hon LAUOFO FONOTOE NUAFESILI PIERRE LAUOFO:** Lau Afioga i le Fofoga Fetalai, masalo a silasila ane lau Afioga i le sui usufono mamalu o le Gagana Samoa o le fuaiupu lea (b) o lo o i le isi itu o le tatou Tulafono, lena e faapea mai upu; faailoga e iloagofie ai, faapipiina ai o so o se faamatalaga sese po o le taufaasese. Faafetai.

**FOFOGA FETALAI:** Malo. Ua maea foi le ta taimi.

**Tofa LEALAILEPULE RIMONI AIAFI:** Ia, o lea ua oso saunoa mai i totonu o le vaega (b), a o le mea lea ou te fai atu ai lau Afioga, o le taiala o le vaega. Ia ae le afaina lea tulaga, aua o lea na toe inu lava nai uisiki ia. Ma lou faaaloalo lava. Faafetai.

**FOFOGA FETALAI:** Malo faafetai.

**Tofa NAMULAUULU SAMI LEOTA (Faasaleleaga Nu.2):** Lau Afioga i le Fofoga Fetalai, se i vasai ai foi le sausaunoaga a le Taitaifono aemaise foi le Afioga i le sui usufono. Leaga o lea e tau esese mea ia i le matau atu a lou nei sui usufono. O le tulaga lea e talanoa mai ai Fonotoe pei o le misleading information, a o lea foi e talanoa mai le Afioga ia Leala i le tulaga lea o le unfit for human consumption. Ona o lea e foliga mai o lea e agai le faamatalaga a le sui usufono i le uisiki lea sa aumai mai fafo, lea na matou o talu ai nei lava aumai ai matou pusa. E manaia la ae faamanino mai e le Minisita po o fea tonu lea e agai i ai, ne i te i ua matou faatau fagu ia a o lena e unfit for human consumption, ona faaletonu ai lea o se isi o matou. Leaga o lea na faatau talu ai nei i le vaiaso na tea atu nei, ae lelei lava le

faamanino mai luga, leaga o lea ua uma ona faatau atu i le mamalu o le atunuu.

Ma lou faaaloalo faafetai.

**FOFOGA FETALAI:** Malo. Malie ia, e ui lava solituaoi le saunoaga a le sui usufono ae tulai maia pe i ai se isi faaopoopoga i lau Afioga i le Minisita.

**Afioga Hon TIALAVEA FEA LENIU TIONISIO HUNT (Minisita mo Tupe Maua):** E leai se faaopoopoga lau Afioga. O le tulaga i le vaega lea o le Tulafono e fitoitonu lava i fagu ia na aumai, e mafai lava ona faaaoga, a o label la e label mai ai pei ona saunoa le Taitaifono, a o fagu ia e mafai ona faaaoga ua uma ona test e le SROS la e lelei, e taofi la e le matou Ofisa e le mafai ona avatu i tua, ona e taufaasese le label la e aumai ai, e taufaavalea, ae o la e lelei. O lena lava e te soifua mai ae 4 au fagu na inu.

**FOFOGA FETALAI:** Malo. Ia se i silasila ifo i le sao o nei mea i onana le tatou atunuu. Malo faafetai.

Ia ou te tapa lau Afioga i le Taitai o le Maota i se lafo e faaauau ai le tatou galuega e faamaea ai ua toetoe lava o ni nai minute faamolemole.

## LAFO MO LE FAAAUAUINA O ITULA FONO

**Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ona o le faanaunautaiga ina ia faamaea le tatou Pepa o Galuega na atofa mo le aso, ona o le taua o nei Tulafono, ou te faatu ai le lafo, *Mo le suia o Itula Fono e faapea, ina ia faaauau Taulumaga a le tatou Fono Aoao i le aoauli nei seia maea le iloiloga auiliili ma le faitauga faatolu o nisi Tulafono, ona tolopo ai lea o Taulumaga o le tatou Fono Aoao mo le masina fou.*

O le lafo lea ma le faaaloalo.

*Faaluaina e le Minisita mo Pisinisi, Alamanuia ma Leipa, Minisita o Galuega, Felauaiga ma Atinae Esee ma le Minisita mo Tina ma Tamaitai, Atinae o Nuu ma Afioaga ma Agafesootai.*

*Na faamaonia le lafo.*

**FOFOGA FETALAI:** O le a faaauau le tatou galuega seia maea ona tatou malolo ai lea. Ia ua manino lea mataupu. Ia pe ua manino Namulauulu le tulaga o lou finagalo?

**Tofa NAMULAUULU SAMI LEOTA:** Ioe. Faafetai.

**FOFOGA FETALAI:** Faafetai lava. E vave lava ona manino Savaii.

*Faamaonia le Fuaiupu 67.*

**FUAIUPU 68: Tulaga mama ma le tausiga o nofoaga ma fale ua laiseneina.**

**Afioga FUIMAONO TEO SAMUELU TEO (Falealili Sasae):** Lau Afioga i le Fofoga Fetalai, o le vaega foi lea o le Tulafono o lea ua talanoa i le tulaga o le lē sefe foi lea mo le faatauina ona o le taufaasese. Na pau lava lea pe o i ai se vaega toe teuteu o le Tulafono lenei ina ia...

**FOFOGA FETALAI:** O fea le mea taitasi lea e saunoa i ai le afioga?

**Afioga FUIMAONO TEO SAMUELU TEO:** Ia, o lea ua oo i ai i le tulaga foi lea i le tagata na te aumaia oloa nei i totonu o le atunuu ae le i mauaina i tai i le uafu po o tatou uafu faamolemole. Pe i ai se vaega faapena.

**FOFOGA FETALAI:** Ia, ta o sese ai faapena i lou finagalo. Ia, se i tulai mai le Taitaifono pe i ai sou finagalo e faaalua i le mataupu po o la e ua tali lava e ia ia.

**Tofa Hon LAUOFO FONOTOE NUAFESILI PIERRE LAUOFO:** Leai lau Afioga, e leai, manaia le fesili a le sui usufono mamalu, aua e ese le Tulafono lea e aafia ai le mataupu lea, tagata foi nei e faaulufale mai i tulaga sese ma isi tulaga mea o oloa i totonu o le atunuu.

**FOFOGA FETALAI:** Malie le sui usufono mo Falealili se i tatou oo atu i ai ona e toe tulai mai lea.

*Faamaonia le Fuaiupu 68.*

**FUAIUPU 69: Tuuina atu o faamatalaga sese.**

*Faamaonia.*



**FUAIUPU 70: E noatia le tagata ua fai le laisene mo gaoioiga a tagata faigaluega.**

*Faamaonia.*

**FUAIUPU 71: Pepa faatumu faamaonia.**

*Faamaonia.*

**FUAIUPU 72: Faoa faamalosi o le ava malosi.**

*Faamaonia.*

**FUAIUPU 73: Puipuiga o sui auai o Komiti Faatino ma isi.**

*Faamaonia.*

**FUAIUPU 74: Tulafono Faatonutonu.**

*Faamaonia.*

**FUAIUPU 75: Soloia.**

*Faamaonia.*

**FUAIUPU 76: Aiaiga faasaoina.**

*Faamaonia.*

**FUAIUPU 77: Aiaiga tau soloaiga.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Tulafono e Fuafua Tatau ai le Ava Malosi 2018.**

**FOFOGA FETALAI:** O lo o i ai le faasaoga a le Komiti i le Fuaiupu 1 ma le Igoa. Ma le faaaloalo ou te tapa lau Afioga i le Taitaifono.

**Tofa Hon LAUOFO FONOTOE NUAFESILI PIERRE LAUOFO:**  
Lau Afioga i le Fofoga Fetalai ou te faatu le Faasaoga i le Fuaiupu 1 ma le Igoa e faapea:

**“FAASAOGA:**

Ia aveese le fuainumera 2018 ma suia i le fuainumera 2020 ma faitauina ai le Itoga o le Tulafono e faapea:

**Tulafono e Fuafua Tatau ai le Ava Malosi 2020”.**

*Faamaonia le Faasaoga.*

*Faamaonia le Fuaiupu 1 ma le Igoa e pei ona Faasaoina.*

*Na faagasolo le Tulafono Tau Faaofi e Fuafua Tatau ai le Ava Malosi 2020 faatasi ma Teuteuga ma le Faasaoga.*

**TULAFONO TAU FAAOFI O TEUTEUGA O LE TULAFONO O LE  
FAASOLOGA O TIUTE 2020 – iloiloga auilili**

**FOFOGA FETALAI:** E tusa ai ma Tulafono Tumau, e ao ona faamaonia muamua e le Fono Aoao le Lipoti a le Komiti i le Tulafono Tau Faaofi ona faatoa sagai atu ai lea i le Iloiloga Auilili.

Ou te tapa lau Afioga i le Taitaifono o le Komiti.

**Tofa Hon LAUOFO FONOTOE NUA FESILI PIERRE LAUOFO:**  
Lau Afoga i le Fofoga Fetalai ou te faatu le lafo, *Ina ia faamaonia e le Fono Aoa le Lipoti a le Komiti o lo o fautuaina ai ina ia faagasolo le Tulafono Tau Faaofi o Teuteuga o le Tulafono o le Faasologa o Tiute 2020 e aunoa ma se teuteuga.*

*Faaluaina e le sui usufono mo Aleipata Itupa i Lalo ma le sui usufono mo Palauli le Falefa.*

*Na faamaonia le lafo.*

**FOFOGA FETALAI:** O lea ua maea ona faamaonia e le Fono Aoa le Lipoti a le Komiti ma o le a sagai atu loa mo le iloiloga auiliili o le Tulafono.

**FUAIUPU 2: Ua teuteuina le Faamatalaga Lona Lua.**

*Faamaonia.*

**FUAIUPU 1 MA LE IGOA:**

**FUAIUPU 1: Igoa puupuu ma le amataga.**

**IGOA: Teuteuga o le Tulafono o le Faasologa o Tiute 2020.**

*Faamaonia.*

*Na faagasolo le Tulafono Tau Faaofi o Teuteuga o le Tulafono o le Faasologa o Tiute 2020 e aunoa ma se Teuteuga.*

## **LAFO MO LE FAATAATIAESE O TULAFONO TUMAU**

**FOFOGA FETALAI:** Ou te tapa se lafo mo le faataatiaese o Tulafono Tumau. Ou te tapa lau Afioga i le Taitai o le Malo lau Afioga i le Palemia.

**Susuga Hon TUILAIPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Lau Afioga i le Fofoga Fetalai ou te faatu le lafo, *Ina ia faataatiaese Tulafono Tumau 108(4) ina ia avanoa ai le faitauga faatolu o Tulafono e 2 ia sa Iloilo auiliili i le aso Fono lenei.*

*Faaluaina e le Minisita mo Tina ma Tamaitai, Atinae o Nuu ma Afioga ma Agafesootai ma le Minisita mo Pisinisi, Alamanuia ma Leipa.*

*Na faamaonia le lafo.*

**TULAFONO TAU FAAOFI E FUAFUA TATAU AI LE AVA  
MALOSI 2020 – faitauga faatolu**

**FOFOGA FETALAI:** Ou te tapa lau Afioga i le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Faafetai i lau Afioga i le Fofoga Fetalai mo le avanoa. Ae le i faatuina le lafo, e momoli atu le faafetai i le Komiti ma le Taitaifono e tusa ai ma le galuega sa feagai ai, e le i faigofie le galuega o le ava malosi, ona e taua tele lenei Tulafono. Faafetai le galulue.

Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi e Fuafua Tatau ai le Ava Malosi 2020 i lona faitauga faatolu.*

*Faaluaina e le Minisita o Tupe, Minisita mo le Soifua Maloloina, Minisita mo Faatoaga ma Faigafaiva ma le Minisita mo Aoga, Taaloga ma Aganuu.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.*

**TULAFONO TAU FAAOFI O TEUTEUGA O LE TULAFONO O LE  
FAASOLOGA O TIUTE 2020 – faitauga faalua**

**FOFOGA FETALAI:** Ou te tapa lau Afioga i le Minisita mo Tupe Maua.

**Afioga Hon TIALAVEA FEA LENIU TIONISIO HUNT:** Lau Afioga i le Fofoga Fetalai ou te faatu le lafo, *Ina ia faitauina nei le Tulafono Tau Faaofi o Teuteuga o le Tulafono o le Faasologa o Tiute 2020 i lona faitauga faatolu.*

*Faaluaina e le Minisita o Tupe ma le Minisita mo le Soifua Maloloina.*

*Na faamaonia le lafo ma faitauina le Tulafono Tau Faaofi i lona faitauga faatolu ma faapea ona pasia le Fono Aoa o Faitulafono.*

**FOFOGA FETALAI:** Ia, malo faafetai, o lea ua tatou toai taunuu i le siui ma le mutaaga o le tatou galuega e pei ona faatulagaina mo le aso. Ua i ai le manatu ua malo faafetai le galulue, ua faasili foi ma faaova le tatou taimi galulue ona o le manatu ina ia talafeagai ma taimi o tatou Tulafono e pasia ai ma faitau ai i lona faitauga faalua aemaise foi o lona faitauga faatolu, aemaise foi o Tulafono ia faapena ona tuuina atu i Komiti a le Palemene e galulue ai ma toe lipoti mai i le Fonotaga a le Palemene o lo o loma nei. Malo galulue, faafetai Samoa i lau tapuaiga.

Ae ou te le i alulua, ou te tapa lau Afioga i le Palemia mo sau saunoaga ma sou finagalo.

## LAFO MO LE TOLOPOINA

**Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI:** Ou te faamalo atu i lau Afioga i le Fofoga Fetalai i lou lavapapale i le tau faafoefoeina o le Fonotaga lenei a le Palemene. E faapena foi ona ou faamalo atu i sui usufono mamalu o le Fono Aoaofaitulafono sa sausaunoa ma faisao i tatou Tulafono e 4 lea ua maea ona soalaupuleina i lenei aso.

Faamalo foi i le tapuaiga a Lana Afioga Mamalu O Le Ao o le Malo faapea foi le Sui o le Fono a Sui Tofia, tainane le Faamasino Sili ma alii ma tamaitai o le Faamasinoga. O le paia lava lea faasino i le tapuaiga a Aiga ma latou Tama, faapea foi le Usoga a Tumua ma Puleono i Salafai, ae matua lava le tuu i le faanonogamanu a le aufai tatalo o lo o latou tapuaia o tatou faiva. Ua maea ona soalaupule ma faisao i Tulafono e 4 na fuafua mo le faatalanoaga i le Fonousu lenei a Samoa i le aso. Faamalo le usufono. O a foi ni lafoga ua tau afaina ai lo tatou vatapuia, ia o tulaga lava ia faale-Maota Fono lenei, “e tetele lava i pesega ae matua i le oo”. Ia maua foi ia i tatou le loto faamagalalo.

Ia pe a taape le filialii, faamanuia le Atua i sui usufono mamalu o le tatou Fono Aoaofaitulafono.

Ma ou te faatu ai le lafo lau Afioga i le Fofoga Fetalai ma le mamalu o le tatou Maota nei, *Mo le tolopoina o le tatou Fono i le Aso Lua, 15 o Tesema 2020 i le 9:00 i le taeao.*

**FOFOGA FETALAI:** Ua faatuina mai le lafo ina ia tolopo le tatou Fonotaga i le Aso Lua, 15 o Tesema i le itula e 9:00 i le taeao ma ua faapena ona faaluaina e Minisita o le Kapeneta.

*Faaluaina e le Minisita mo Pisinisi, Alamanuia ma Leipa ma le Minisita mo Tina ma Tamaitai, Atinae o Nu'u ma Afioga ma Agafesootai.*

*Na faamaonia le lafo.*

**FOFOGA FETALAI:** Samoa ma le paia o leni Palemene, o le a le toe oo se tala i le tulaga o mamalu ma le tafatolu o Malo aemaise o le Kapeneta faapea foi le Faamasinoga ma le Palemene, aemaise o le faafofoga tapuai mai o Samoa i ona tulaga maualuga ma ona tulaga masani, o lea ua malele ma saunoa i ai le Afioga i le Taitai o le Malo, ia, o le leo foi lena o le Fofoga Fetalai. E leai se iota, leai se mataitusi e aveeseina Samoa.

O Samoa o le atunuu tofi e tumau e oo lava i le faavavau. E faapea foi i le aufaigaluega tofofi a le Atua, i lo outou faiva, e tou te tapuaia faiva o le atunuu, i le ao ma le po, po ma le ao, ia malo tatalo. E faapena le galuega, ia e manuia faiva o le Palemene, ia aemaise so o se tama fanau a le atunuu o feagai ma le atinaeina o Samoa, e manuia o la outou tatalo.

Ia manuia le tapuaiga. Ia ae e tatou te le i tolopo, ou te tapa le sui usufono o Faasaleleaga Nu.3, e na te faaiuina le tatou Fonotaga i se tatalo, lau Afioga Tofa.

*Na tolopo Taulumaga a le Fono Aoao Faitulafono i le itula e 1:17 i le afiafi seia aulia le itula e 9:00 i le taeao o le Aso Lua, 15 Tesema 2020.*